

句曲外史貞居先生詩集

句曲外史

貞居先生

PDG

貞居先生詩集序

陶弘景在齊梁嘗掛冠居句曲山自號華陽隱居性雅淡葢山水每經澗谷必吟詠取桓衣喜著書賦詩旁通陰陽醫藥出術朝廷屢徵不起屢已高尚稱之後七百餘季當元盛嘗貞居已

儒者抽簪人道自錢塘來句曲
負逸才英氣已詩著名格調清
麗句語新奇可謂詩家出傑出
者也當是昔已詩文名垂者若
趙松雪虞道園范德樸楊仲宏
諸君子已英瑋之姿凌跨一代
諧鳴于館閣之上而流風餘韻

播諸公壑之間貞居已豪邁之
氣超然自得獨鳴于公壑之間
而清聲雅調閭諸館閣之上諸
君子夾嘗與其唱酬往還雖出
處不同而爲詞章之宗匠譬
如軒輊詎知其孰先而孰後耶
矧貞居博學多聞襟袞蕭洒故

大夫士多景慕而樂道之也夫
隱居貞居皆由先後好尚問學
侶未可已同曰語然隱居之清
風高節貞居之雅度逸才亦可
謂前春而後應豈非勾曲山清
爽之氣鍾秀於二子歟呂吾夫
子中庸之道脩己治人之學全

聲玉振之文昭著于天墜使其
學道而望洙泗之科猶未易量
也至若奔競功名蹀躞聲利醉
生夢死不自覺者則二子之風
度將追嚴子陵陸脩靜之武歟
易曰平事王侯高尚其事二子
其庶幾乎貞居張姓雨名伯雨

字貞居其自號句曲外史
稱之也吳郡徐達左序



句曲外史貞居先生詩集卷之一



吳郡海昌張雨伯雨撰

江浙鄉貢進士姪誼編類

吳郡徐達左校正

辭潭上行吟觀潭中樹影

壑流洑兮若媚景內澈兮下孰為地惚馮虛兮轉煩
恍臨深兮旋墜群木倒植兮雲薄其外雲乘颺兮羣
木皆曳使子極冥々而下視兮審蒼々兮若是

題黃子久畫

大山坳兮矗立浮雲靡兮上征幽人居兮泉縈澗絡

玉趾傷兮木縱石橫

銘 劍石銘 石在景隆觀長踰尋廣不及尺黝

碧如鉄鑕鐔具焉予作銘未幾夜半有力者負去

鍊質鴻蒙挺鋒截障正一之氣弗壅弗遏星精內孕
玉理傍達瑩謝鵜膏書存紅沫倚天卓地排氛鎮魃
坻茲神宮善建不拔

樵竹杖銘

上 樵竹江心古所尚採作仙人玉節杖挾尔飛行九霄

白雲窓銘

衆山皆空一室且虛以空合虛白雲攸居假吾身之
戶牖為元氣之道途無之為用蓋聖人所不能逾況
居室乎

四言

春雨謠效謝靈運善哉行仍依韻

南山殷雷靈雨辰落漑々湍瀨翳々林薄惠我霑足
忘彼離索北谷虛受游氛汛卻嵌巖篁鼓隰隴謳詭
脉潤纖茨溜搏餘萼載歌停雲懷人於鑠柴桑邀矣
觴至獨酌亦勞尔耕飲和祛瘴勗哉老農同憂同樂

分題山水幀

入山種樹其葉紛披迨予還山樹禿無枝戕于斧斤
人得衛之寒暑之戕予其早衰

琴賢為濱洲葉則善作先是薛外史贊綰書
大字類顏光祿體則善復命僕次韻配之

石上之枯玉質粹美徽絃琴戔亂以松水擬操白雪
強名綠綺大音希聲無隱乎尔

摘阮圖

長松結陰芳草如莽丘中微吟有天際想彼阮者咸
我撫掌一鳥不鳴衆山皆響

畫水仙花

取石為友得水能仙金相玉質林下蕭然

樂琴書齋

蕭齋何有有琴有書佩陶之言亦陶之徒

攬鏡

適然覽鏡我在其中當其無我馮此頑銅分形攝受
我在何處火熾金鎔何以回互所見者光孰者為鏡
見光為土所以病々我持寸鐵不磨不瑩縱橫三界
物々照暎

黃子久小幅山水

一丘桓：曲折餘地石瀨濺；林薄翳；待仙有樓
忘歸有臺雞犬相聞不相往來游神其間歛形如豆
邈不可追隱入岩岫

書屏

山澤大寒朝氣上游淥波如雲孤嶼欲浮

五言古詩

玄洲精舍

吾愛柴桑言所居何必廣況此金鄉室寸地皆福壤
岩栖晚更幽微雪帶林莽風生獨獸號山空衆泉響
有聞唯寂音無媿即純想昔賢非樂此澹泊欲誰賞

獨游天信菴

獨行寒澗底蕭條濕霜露驚麝突人來躍入青蘿去
落木深已腐亂石割芒屨我見康莊衢隘於林下路
建蘭一枝浸菖蒲盆洗中宜若從類

美人折芳馨意重蒼玉玦把玩何以滋罍罌非所褻
席間樹昌蒲泓然一螺雪倚蘭與之俱光景相洞徹
迺若離羣居濯足以自潔又如服食士俛首尋九節
振以冷風清食以寒泉冽秋菰雖云冷寧洗肝肺熱
養目良區、出門芳草歇

四月旦舟抵錢源不數武出長塘湖水涸不

能進是夕大雨明旦絕湖入白石瀆四十里
即薛步

閣舟菰蘆溘夜雨來如期水生天未白
拔拖入渺泚
縠裙初頽面螺黛新刷眉盛我大珠中
獨與蛟人嬉
使昔衝暝迢幾用失此竒意行每如此
動靜寧容私
僧號月潮自金陵來乞詩

陰精赭玄水中黃溢金樞高深感盈縮
在理信方諸
氣機應辰至崩然衆壑虛十芒躍風輪
不墜亦不濡
鰲波激瀕洞華耀寂以舒靈潤閱終古
流明施八區
彼美西方人頽仰誠有餘

獨酌

靜極忽不愜掩書曝前軒榮木樊四維時禽托孤園
羣物方趨功吾衰恒晏然本乏超世才偶脫區中緣
妙理寄濁醪嘉名愛灵山從吾所好耳富貴須何年
己巳歲饑乞米

故人念我飢貸粟仍借車歸來荒山道不敢嗟馳駟
升斗乞東家西鄰餅甑虛前車得傾筐後車已無餘
餓殍滿中野搯擊將何如

玉蕈

山間采三秀尚之以瓊英明麗漸水芝豐腴謝山精

濯以玉色醪芼以玉糝羹即此夜光草服食當眼明
韓子自屈強但取木雞烹

讀五代書

五閏持旦暮各有忠義死寧表雲叟輩實誅長樂子
獨行非激矯僅足以遠耻明々避俗心堂々報知己

寄虞侍講有序

伏讀遠祖季鷹雜詩有云榮與壯俱去賤與
老相尋壯固去矣而榮非所慕賤且老非山
林之真也聊韻五言五章寄上

擊舟昔行遽阻奉閭門宴一由山世闊幾玩霜暑變

遙應金閨夢夜對青城面嗟余往不返曷以道狂猶
異哉於陵仲處此台鼎賤

架岩棟且撓何以守風雨靈人未降室形景相賓主
頰傾乳豹啼仰聆高松語冥寂乃尚志悅悟詎求侶
咄哉道非窮丘壑天所與

僊人如華月照耀金銀鴨屢前談經席頻寫徵賢草
味道以為糧掄才以為寶漢廷二司馬較之彼為少
未信平津侯咲視轅公老

異時皇華使一返仁壽鄉再拜丞相孫父老涕泗滂
劍履有遺跡宰木相與蒼感激施張道厥嗣久弥昌

高厚論功德山川其可忘我識丁令威不如劉子相
知北皆天游圖南猶陸沉豈無萬里風舉我埃壒襟
鍛翻非所任勸焉息中林長吟頌沈寥譬彼九臯音
寄謝天祿閣藜杖或能尋

種栢

手遷稚栢栽荷鍾趨晴暄出彼榛穢區離立向南墩
入夜霰雨集霑洒徧竹園竹欣栢亦悅況此薺麥根
病夫濯足已政要雪塞門展茵蘆絮重漉酒松肪渾
縣知天下寒尚愧一榻溫自無種樹書何以遺子孫

獨行

春泥未成莎曳杖柔且平春風不鳴條振衣涼且輕
我意本靜悵中林便獨行松蓋無曲景水樂皆全聲
踽々迫前岡悠悠々度斜阮老樵眼如貓見我不問名
直贈金光草疑是古先生

晚興二首

清夏晷舒偃仰托林麓枕冊輒酣寢把卷仍廢讀
學筌忘有漸靜軌尋稍熟彼狂逐日者未得先償辱
礎潤報時雨鴉啼催夕關盆荷初暎水蒲竹澹相叅
引我傾一瓢頽然窓几間夢乘鹿頭舫飛度浮玉山
清風亦何預假尔聊往還

劉宗師謁貞白墓上獲紫芝一本先是虞
侍講送還山詩云欲把紫芝歌隱德三茅應
聽月明中余故實以此篇

昔在唐天寶芝生舊館壇陰宮代劍飛千載有遺丹
真人帝所來上冢豈空還投我五色烟報之三秀繁
瑞莖標麒麟寶葉綴琅玕既副詞臣頌貞符垂不刊

偶題

蚤脩隱居服獨表外史冠無用固應尔豈唯能自寬
樹蔭曲延坐鳥語密相誼墨卿悅性情麴生知肺肝
求志一以遂吹萬何足論

福鄉仙臺晚步次韻季和

麋廡我興衛雞犬一樊隔坡陀稍勃窣風葉凜輕榮
多君有仙氣廣頰鬚蝟磔袍霜赤離、巾天青脉、
手持金鴉鑿松下數神魄倘脩服食訣庶貸年運迫
嗟余晚聞道衰髮無可白唯餘太平酒粗慰長年客

書東秀閣下小室

長松老人意傾蓋蔭其根下有尺宅土上為日觀軒
迴互倚芝嶺刻畫分藥園岩陀曲如蝸、角有餘寬
篆籀巾几淨燒术床敷温請書大鵬賦為尔作屏藩

製术煎成

菽藥非一鉏獲薪當幾輿火龍勤視鼎窮日金華沽
山精有至精紫琳比其腴芬馨達雪廬滴瀝動烟厨
始防橘木偷雞犬亦被駟滕以金嬰儲量以翠管齎
我得消勞痾民瘵何由蘇鴻恩知出世唯有庾肩吾

次韻倪元鎮游席丘

振屐稍踐危援藤遂支滑尚餘金玉氣山川相映菽
沼吳不滿眼軒中樹如髮花覆闔城石繞生公榻
適與幽人携及茲暮春月坐久得忘言移鞍蔭清樾
玄文館省郎牛仲庸諸賢雅集籌韻賦詩得
綠陰生晝寂第三字

館壇昔遊集河上樹陰成解后嗜石公初辭蘭省榮
珎圖不停披華觴復屢傾燒香鮑靚室促席桓伊箏
樵者本在山為子重入城能無伐木詩相與慰平生

午日烏蜀山人

道傳柳公自号

鄭石門子元祐小集

玄文館分韻得照字

陽礪青蒲積陰叢朱華耀兹辰属夏五撫景發悲嘯
清風進涼館溽雲頽高照楚狂非沉酣樂與探道妙
河東擅雄文谷口專雅調而我結喉語轉鍊若牛噍
中嫌野格卑外懼罰觥醕彦會寧復得歸歟從荷篠

清權尊師集中覽庚戌見懷一詩感念今昔

自傷之情多

天既勞我晚不如早息我奚止七不堪於世無一可
空山酒半瓢禿鬢花三朶平生仲長統誰能曲如瑣

感興

秋氣薄山木白露先蒼然如我老色至早衰豈問年
既盛行復歇既促行可延我獨異於彼去留皆得全

湖上夜

湖水夜逾白衆山何黝然遠火久亦沉菰蒲積無邊
行雲時逆月微波暗嚙舡展轉自無寐城中人盡眠

玄洲新涼快雨

偃息萬林秒葉聲知雨來既霑槁壤苗亦洒渴心埃
着冠引寒泉振衣迎涼颺孰云羲皇遠一適遂與儕
鶴臺澗下有兩松對立如表交結如蓋翳在
藂莽過輒睥睨之乃乙亥冬閏王朔躬具畚
鍤徙澗一步便由松門出入菌巢曰之改觀
青松夾為門有意古人哉常見山中雲歸從門下來
頂上台仙宅根旁斗澗回由來蔣生逕豈為俗人開
兩鳥吟乙亥子冬二十有六日

東山高樹林中有兩鳥栖下上聲相酬翮其好羽儀
咄哉鬼蜮徒在陰久伺窺舍沙中其一摧落不移時

其一哀嗷、顧影長孤羈凡鳥雖累百生不與之諧
朝為雲中鸞莫作松下泥折我平生友淚盡書此辭
偶讀樊川詩其自遣云四十已云老側然有
感目用其末語次韻一首

五十亦稱老髮禿更無餘舌在毋高論眼明猶細書
空中唯咄々夢裏且遽々不恨琴絃絕常恠酒疎
債春媿伯鸞下帷慚仲舒向來高士傳於我意何如

紆情五言

宿植知好古託生

神元朝殼中非所游一命偶見逃句容愚迺容愚溪

賢者遭顧乏，賃舂力人役。亦已勞望如野田鶴，未舉先防高。徒貽達四咄，我景無持操。

次韻張仲舉見懷

當酒悲慨深，聞歌志意滿。廣陵家無恙，傳食諸生館。如何山公啓，蚤不置黃散。翻覆如蝨蟬，借書作妍暖。一官魚上竹，萬事蟹登斷。所以鴻乙徒，冥飛遂忘返。

次韻倪元鎮見懷

玄句何蕭、咀味生華滋。換著空頂幘，把卷適臨池。憐君柔緩情，起我淹留思。丘園歲將晏，幽期方自茲。

陸渾古思仙

臨海燒山中乃有一仙人自號彭先生實是鄭子真
頭著黃綃帽小舸乘水濱時來向人間采錄脩道身
世路皆滯濁如何不我親

是歲十一月復還茅山十二月廿日雪廿六

日得春

風從廣莫來雪落不暇整萬林既璀璨一隙亦光炯
挈將羣玉府置在積金嶺建節迎東皇何辭羽衣冷
陳衆仲儒學副提舉秩滿入都

春山多游雲文采美無度若人廉且貧被服皆寶璐
三年杭州飯鮭羞亦已飫留我翠雨亭還君玉堂署

倪元鎮玄文館食飲

親知貴泐密屢此良燕會堂陞自崇廣促席歸卧內
說詩盛使氣屈折高李輩更端輒咲謔知節已霑醉
玲瓏雨花亂蕭屑風竹碎政使韓伯休移床夜相對

雨宿玄文館懷惠山

十日閉春院草積青苔厚梢止侵窓雨爭鳴決渠溜
想見螭口泉玉色動闌甃便尋雙鳧馮翻飛入烟岫

上己日游惠山訪趙蒙山別業次韻元鎮

濯々嘉樹色肅々紫殿陰崇岡既延睇寒泉復洗心
節物士女繁而我得孤吟杖者足易疲移舟指烟林

龐公豈無家魚鳥不厭深適茲芳春月就子玉山岑

次韻謝別元鎮

平生好游意於世未數誰能長隱几局促守南郭
君家雲林幽夢寐所栖泊願予衰白久一見當吒喏
鳳雛世未識夙昔有成約白衣造齋閣清童觸鈴索
浪迹何由拘進退如野鶴向來濟勝具不借猶可着
他山好泉水揮弄還自酌時禽集芳藜文魚躍陰壑
到處一卮酒風軒看花落野籟間侯鯖提携出絲絡
主意亦云厚未厭此客憇外人那得知孤雲豈無托
不見塚纍纍安用綬若々期之采真游取味在藜藿

謁博桑

一尺水蒼玉刊為謁簡文臣兩再拜謁博桑太帝君
下土恒寒若風雨來無垠時當二陰節夜短晝長昏
家々曳木履朝々拖絮帚高田陷白水立苗那得耘
願借三足鳥老距裂浮雲暴磔鼃輩曬乾鸞鵠群
羲和遂命駕廓哉天地分

虞翁生為龍虎山柯君作天樂說要予詩后

至樂本無樂天君恒寂寥鵬鷄體則殊大同一逍遙
吟咏東柯仙怡神々自超已無赤松子或有青城樵
人日後雨雪復作

雨雪出年後青春為白水伊誰惜光景太息巢居子
詰朝始雷候生物具敷藹遂令整護者思逐龍蛇起
蕤賓鉄琴詩有序

管子曰不可呼以聲而可迎以音其蕤賓鉄
之謂歟芳洲法師所蓄琴體製合古篆銘特
佳近代所希有目設其義賦詩一章仍用孤
山中庸子古琴詩韻示不忘本也

伊誰識古鉄遂將銘雅琴金木有相感況乃達人心
無心始朝徹有耳皆哇淫自非一再行終作千丈沉
素絃山雨幔石薦紫苔侵我来為拂拭懷古抑何深

抱之望虞舜願鼓南風音

揭學士舍我歸豐城大雨阻江干五日

纜舟湖濬淺出門雨脚大宛轉不能留倉卒解其縛
城中泥沒膝想見愁無奈已東錢唐裝難鼓桐江施
疾風日夜作屋瓦遭掀播莫揺白板扉上有青城唾
草樓屹不動猶想元龍卧天明望旭日一葦秋潮過

飲太乙宮次韻明德

子真天下士開口祗譚玄聚散屈伸肘光陰大小年
室虛仙樂降飲長宮燭然道師若山雪照耀石門泉
會有青藜杖叩君床榻眠

十月

簷間飛蠅聲屋頭霜葉鳴羣蛙且閤々似與池鴈爭
亂似癡蚊語夜枕不能平如何肅殺候陰類方施行
老鶴但俛首呼之嬾能應

四明呂與之許寄塵尾

海濱呂道士知我尚幽竒欲寫琴心去當攜塵尾來
豈無白羽扇塵埃寧復持常從野人語聊代青松枝

吳市湯文英賣藥七世同居

吳中有隱者野服意蕭散自非韓伯休梅尉乃其伴
世人常見之種德不自滿如何同居久尚見黃楊短

服用雜詠四首

十年著一冠一冠已三載緇塵無留迹色為玄雲靄
長纓安所施輕道猶足浼每彈出新沐泥丸映朝彩
短髮不容被初服詎可改

右玄冠

衣褐賤者徒寬博孰敢儼一裘三十年昔有齊晏子
寒溫屢開闔補綴亦云幾與衣狐貉立翻為仲由耻
信有不變玉貞紘居白裏

右素褐

客從麻姑來遺我楮素余肪膚皓難滓銘骨滑易伸
妃此木匡床共葆一色純雞鳴風雨夕鴈度霜雪晨
楮君方眷目之乃凝神

右楮余

粵昔大知舜有作陶河濱先民尚其質後世挹其醇
我亦舜之徒對之稱素臣木槩仰承足秋水酌及脣
守此三代寶孰謂吾廬貧

右陶尊

雪中用元鎮見懷韻

郊邑乍飄瞥林岫皓已盈陽簷凍羽墜陰壁素苔生
擁衣一再起挈壺時復傾高卧足自了飢寒迫人情

盤車圖

回車指江南輜重來未已莫問橐中裝但看城門軌
不緣車折軸有日輸官裏

二禽圖

尔鳩何佻巧錯々繡其領一為晴雨誤更眩羽毛整
鵲巢豈不佳願弄棘枝影君看九皋鳥素意良不逞
尔鷄豈真淳好鬪頗爭雄野田無餘穗偷我枸杞紅
蒼鷹鳴聲飢側目在曾空早從斥鷃徒自蔽蓬蒿中
斲江和尚遷化追和芙蓉洲雅集韻悼之

一讀遠公作竹樹動涼颼蕭々葛衣雨朱陽不敢驕
共戲芙蓉洲獨憶青城樵華盖未即往雲門久相邀
如何千峯雲散去不崇朝子立井上松頗視風木搖
未信塔中人直為艾與蕭琳瑯有道韻自足洗煩囂

中庭移石

前朝一片石墻根黃土埋人力以置之兀然向高齋
汲泉洗其泥秀色冷侵階穩々樹陰坐箕踞脫芒屨
舉目視雲漢亦足舒吾懷

二君詠贈南康黃虞尚德

父有黃徵君隱居三百季所居陶令宅所種陶令田
手把白鹿紙濯足臨斜川風吹頭上巾醉卧菊叢邊
顧彼佟儼等五子羌若賢

徵君字伯庸宋文懿公諸孫隱居教授尚德其長子也

武有皮將軍好書不好武化兵為農器耕種廬山下
農閒事畚築々屋醉石處堯牟挂壁間長倚松樹
時々跨牛出相過黃牀度

將軍字小山星子里人虞太史稱其好賢樂士築醉石書院于栗里

陸季道為張元明作雲山圖求詩其上

羣山如陣帆出沒洪濤中白雲自多竒不倩粉墨工
澹然相怡悅所得亦已豐石門吾故廬奚必窮華嵩

題無外墨蘭

藜蘭生深林衆草連根株國香不可掩政尔山澤癯
如彼上人者鷗居東海隅清風洒六合燕坐祗如々

番陽蔡忠伯為寫綠竹虬枝題三韻

此君本孤直托根泰山巔偃為三冬卧頰此千仞懸
咄哉老澗底徒詠山苗篇

山友寄陽和菜

陽和有佳名來自桐君廬竹萌且濡弱荻笋已豐腴
薑醯助芳辛濁醪為先駟猪肝能累人我豈仲牀徒
念此風雨中遠為致佳蔬槭詩荅幽意老饕良足吁

案上稚松

松身不盈尺已有千尺勢高枝走復昂卑者偃將墜
低回耳目玩屈折風雨氣那知閱世人壽與金石弊

次韻陳勛初清風堂讌集

冬仲上七日教父生其時耆年負道德天爵豈人為
長眉王仙伯玄宗相羽儀是日設高會鼓舞稱頌之
使者亦在門少停駟騎馳再拜廣成子遥奉金屈卮

客有陳校書喜賦嘉賓詩冬無祁寒小民寧怨咨
清風被一堂物象皆愉嬉罄此今日歡黃昏以為期
酒深花韻馥樂細壚熏遲外省諸大臣頃刻集於斯
文駟參羽蓋畫戟交金支肥鮮具鼎食特與老人宜
前訶秉明燭再醕碧琉璃心存魏闕下身在吳江湄
從茲至千歲屢和瓊瑰詞

學耕深隱

竹素為良田筆扎為耒耜深畊勿鹵莽進學乃能事
手鋤不貸圃辛苦以求志誰哉有餘力為我治荒穢
為宋直方賦菊岩

空岩何所有采々多寒華芳藂既藿靡乳穴亦豁訝
幼輿一丘壑豈必柴桑家夕英被雲竇朝露盈石窪
企彼中林子其樂當無涯

四月十九日杭城灾燬數萬家開元再造廿
一季至是復燬書異鳥一首以自解

異鳥鸞之族臆對如有訴自從羽翼成栖息無定處

一飛三十載營巢經十度

普福觀開元宮 福真觀 茅山崇壽觀
元符万寧宮 玄洲精舍 南山墓庐

北郭西湖兩迂草樓
今次開元房

或遭惡禽逐或讓拙鳩住在山業風飄

在世劫火聚至今還露宿進退莽無據主人向鳥言
觀汝有竒趣大鵬隘六合天地亦暫寓食汝琅玕實

置汝瑶華圃寧若瓜牛廬偷生在朝暮

初陽臺集老子註

閑居葛翁館載繙老氏書肅然開寶蘊浩若披海圖
仰觀宇宙大頰憐心力微日月有成毀不毀獨玄虛
疏櫺既隱約岩岫亦縈紆林雨奔綠氣風花哆紅柎
養生竹素間而我羨蟬魚總角志聞道白首將焉如

種百合

嘉名寄幽本曾々立庭莎花房玉鵲尾垂露各偏頗
靈根味方澹寧忍鋤其窠養生柳夫子唯種白萐荷

陽德館新居

人境殊谷口園公類河上置身火浣宮分地度尋丈
重屋僅庇日聽事始草創長溝貫北壁暗水借湖漲
其偏有積石苔竹稍弥望昏墉為我鑿灵戶擴以曠
不煩運几席有若坐舡舫雞犬安僻側魚鳥忻近傍
嗟哉所知小知足乃不讓孰匪逍遙游目之齊得喪

廣德簿徐明初偕秋試諸君飲分韻得君字

栽竹未成徑倏已異人羣室中無飛埃牖下有栖雲
茲辰二三子輿致豫章君坐席促尤密咲言温且文
方外日晷長卮酒易夕曛宰邑雖隣近幽襟詎能分

十月筮澤觀稼

三吳本澤國厥壤獨宜禾具區四為維天水遙相磨
浪痕栖半堵今猷數尺坡羣山指洞庭未若稻積多
菘稚咸熙々放豚兼牧鷺牛背者誰子日夕猶唱歌

魚我亭

生物均至性為樂非外借以身而觀身于以知天下
作亭謝公墩魚我適閑暇奚必濠梁游循本此其舍
十月十八日夜震澤風大作明日大雪風雪
異常又明日甲子出大寒得詩二首

弱齡逃世網一勇以求志折旋四十載竟坐有身累
大拙使為巧小樸使為器用是役於人夫豈足言智

飄風鼓具區如我長噫氣追惟年運往通昔遂忘寐
聖人罕言命天道昧難致委順待時來餘日敢終棄
晴燠不可恃一夕冬令變遽忘和煦恩惟曰祁寒怨
老屋雪投隙廣澤風肆便反覆鼓洪濤揚簸塞荒塹
隱然洞庭樂勇甚鬪閭戰萬物芻狗如埋沒加蹂踐
凌晨劇巖沍野日復慈禕仁哉天地心觀復斯可見

謝康樂宴坐圖

好為山澤游矧此靈鷲嶼松枝蘊曲盖草帶解縣組
空巖收經坐塔像為賓主羊何會當耒摘茗付烹煮
予心本無待聊以閱衆甫

黃晉卿提舉徐明初主簿偕游南屏以白頭
想見江南分韻得想字

錢湖多名魚罟害魚長方舟澹容與亦復避鳴榔
指游南峯寺杯水如在掌展席海漚疑掃壁風篁響
跡陪金閨彥興踰石門賞摘辭遺來者雋咏發遐想

其二

湖山如繡畫無復舊東南百年凋瘵餘風景良不堪
禪榻亦埃塵曾屋猶耽々意行何所訢取興於烟嵐
長歌肆激烈雅飲謝沉酣詎學桓司馬種柳哀江潭
龍虎先天觀十四韻為毛升達作

往讀戴子記蚤閱先天圖若非古樓觀定自小方諸
何年發竒璞琢斲無遺餘後來更面勢舊制亦權輿
羅峯既雜遝盤徑復行徐行經濯足澗疑泛石魚湖
崖傾索梯峻林缺表亭孤鳴泉叅鳳袍歸雲冪綺疏
雲上僊風來散華時與俱不知甘露集瑶草綴流珠
縣圃垂光精灌溉渴蟾蜍往々服食久道師冰雪如
常哦七言章盍噉三皇書為掃毛公壇遲我雙飛鳧

雲山圖

青山澹無姿々媚在游雲政如老禿鬢醞藉於斯文
離塵獨偃蹇被物皆氤氲孰究變化蹟動靜俱可訢

和荅高元璞見投

衰羸坐蹇弱況乃出無車豈無崇賢門我蹟自云踈
多子亦好脩肯過蓬華居挈壺藉草飲洒筆臨池書
意游山澤間盖嘗與之俱不知老將至但覺日不如
何由反斯世黃髮於唐虞

南山病中雜詩

毒熱無遁跡風雨津飄搖悠悠逆旅舍栖々病僧寮
形唯莞蓆親過午飯一瓢受命不可易養空遂能超
老骨備衆患直用一丸銷

神蛟宅大壑杯水填外壙存身極幽眇息與溟海通

嶺上層寸雲山下百丈降
槁苗非吾過沛澤非吾功
天地有不仁孰逃嗟吸中

獨游龍井方圓菴僧照請閱五賢二開士畫
象壬午九月廿六日也

獨尋招提游果得世外歡
昔賢所栖集畫象葢屋端
山僧啓鎖魚不待啜茗乾
脩廣各異製精采俱生完
侍郎胡金華高插侍中冠
眉間可容掌手版出中單
清猷薄須眉示我鉄肺肝
尚餘所施物片石櫓而刊
堂々蘇長公英氣邈難干
邛枝紫道服天風吹袖寬
頽濱與淮海秋色亞曾鬢
叅寥獨緇衣領髮茁芽管

最後辨才師文裊高座安空山一室內舉目皆龍鸞
再拜傾挈壺喜極重悲酸去之三百年歸路何漫漫
斯人為列星下視沙蟲繁寧不念學子道路救凋殘
抵舍函摹貌微哉難控搏夢中倘未遇展詩時一觀

任少監畫馬

素練如平沙二駿行相追奚官兩紫髯牽浴試一騎
安得真龍種從我駕御之

奉次黃提舉卅韻送陳性初天台省覲

金華黃太史出為儒臺冠詩文齊六經韓語竒古誰
敢傳如掇明月珠妙在九曲穿而子工筆札狗監非

所薦挈之登龍門果獲尾時彥攷々勤操觚矻々勞
染翰敏手不暇給精筆且屢換憐才吾輩事子乃羞
自獻繇茲數來往無事輒相見湖嶺錯縈紆烟靄爭
變幻一昔快雨餘春物已消半言歸天台奧俄頃語
離散此手不易執明日施樓飯迢々望白雲瀑布聲
許悍赤城亞滄海丹霞以為岸倘遇仙者徒勿易樵
牧賤予衰志求道千載猶暮旦老經三百家一々理
殘卷霜華犯冠籜墨汁漬巾汗何功使願果盡力輸
老腕子書能瘦硬捩眼秋隼健唯餘篋中字照我目
光爛送子望涯返回首窮海甸春夕豈不短反側移

漏箭稍夢金庭遠還逐濤江亂
諭知家庭樂旭日陰
始判身扶老人杖衣借慈母線
還期當及時遲子秋
水觀栖々寡儔侶孤坐至日晏
追步太史作用以申
綏々

雲扉分韻得山字

芳春悅羣動石心胡爾頑
顧諧朋從樂好鳥猶喧々
追惟觴咏闊眷盻風日慳
誓將回逝川永此一刻間
縟苔有隱迹妙卉無頽顏
古來幽貞廬相望屬南山
寒流導前旌暝雲載俱還
我車故逶迤庶使來者攀

雲扉分韻得作字

道言匪虛無梵冊皆矩矱予志夙有尚白首戀雲壑
往求會心侶所遇惟寂寞空山合澗鳴淨界春陰薄
攔楮屬烟靄堦基連巘嶸稍淹林下語遂徙池上酌
踈懷寄儻蕩荷禮謝握齟彷彿臨河集希闊舞雩樂
顧陶一卮酒謬寄千載托有能踵留轍將亦感斯作

九日風雨清齋既久意態泊然

中林授衣節寒氣早已集牖戶泊裘褐凡百闕治葺
窮居昧時序頗訝光景急藁篁助幽翳叢瀨發空寂
水禽穿屋過岩樹排簷入陶尊既塵漬墨突亦雨立
遐思把菊咏端處掬溜室空言非樂餌殆不廢九日

贈鄭明德

五季雖無人獨行惟鄭張今子載同世而我匪異鄉
薦明吾不如子則雲叟強嘉子行祕書以腹為笥箱
操觚仍尚左立辭多惡方吳兒命乞錢掉臂輒取將
智如泥中龜處污深蓋蔽烟庖縣大鬻蝨屋排積倉
兩兒稍卷婁終歲乏彷徨適經吳市門邀我羅酒漿
犬子小名舊蛾眉新畫長吾家老瓦盆無此金玉相
寒林踰正色國艷終媚香狷者有不取聖罔念作狂
願子勗明德豈惟家之慶異時同傳好咄哉無歐陽

雨歸澗阿

步歸靈石鄔泥淲居士屨不知嵐雨深稍怯布衣薄
拂床次羣帙掃迳堆脫籜清坐亦偶然吾非慕仙爵
仙爵見韋蘇州早春歸沐五言

栗窠崇德碩舜卿請賦

燕秦千樹栗處士比封君營窠深且安有巢何足云
其陰食衆狙其顛宿孤雲霜林餘碩果歲暮方策勳

勾曲外史貞居先生詩集卷之一

勾曲外史貞居先生詩集卷之二

澗阿

小丘藏澗阿好鳥常栖宿
蒙籠蔭雜樹蔚密連深竹
日光稍穿漏當晝露如沐
橫陳木榻外顛倒潭水綠
偃仰貴得性所以一瓢足

次韻天鏡僧昧旦絕湖二首寄謝德嘉徵君
湖光絕溟滓纖芥容一舸
渾々元氣中山為破竈墮
前境有通塞所見遂偏頗
日出妖霧起蚊蚋雜螺贏
岸頭濯足竟却還林下坐

白波忽無際黝者為樹林
挈音適延緣漁歸蒲稗深

其語遠若聞其迹杳莫尋仙人愛空水或是赤脚琴
昧爽差有睹遲子一再臨

洪崖仙人圖

西山有洪崖絕壁洒飛泉其下井洞幽湍激如控弦
神境闕天寶先生所周旋世主驚識之席帽朱衣鮮
侏儒吻侵角有若弄臣然雪精豈青騾預識入蜀年

金陵

金陵二開士特恩階太中一居五山首少林之變風
一迂住双徑幾陷綠林鋒遭遇固有時乞身豈不容
使若避魔劫何足稱大雄

淵明

淵明真率人出處端不欺
飢來乞一餐有酒斟酌之
乘興廬山招籃輿亦遲々
聞鍾便回首更用一攢眉

漢祖

漢祖得秦鹿天與非力爭
群雄入罝中四海廓以清
大風思壯士豈無一田橫
綿蕞興禮樂豈無魯兩生
奈何衡石書相國取為經
三代自茲遠遺恨卒難平

白拂

窓間挂白拂青蠅皆屏營
南風一向來雪縷細如縈
非為掃塵帚聊用相風旌

李節婦 為其子庚作

慷慨殺身易從容行義難卓哉馮夫人憂患人不堪
再造其夫家合殯其遺棺護此雙明珠置身清要端
長年食其報貞節表縣官丈夫賊子輩生死亦胡顏

湯師尹畊樂亭

古來豪傑士往、務為農君看帶經鋤其樂非萬鍾
詔減田租半況值年屢豐浩歌茆屋底予亦能相春

澗阿對雨

山雲油然作山雨來不緩既霑靈石塢遂洒寒栖館
落木遽如許衆草行亦爛有酒不斟酌無物堪把玩

與聞季長笛寧從中散鍛代謝夫如何徒為白首歎

贈惠山僧天澤二首

吳下多名溜上人特貞素粵從西澗濱遂枉南山步
秋澹水容寂嶺迤嵐光注縣知露草深及門方易屨
何必有待游一往自成趣

行經桑苧祠林屋翳青篲石泉漫流好掃地設茶宴
松蘿深復深不到看經院

冬雨

玄冥有盜面請雪以雨代涸泉借洎滴燥圃仰沾漑
乍聆風聲勁旋看雲脚碎南方瘴癘作始覺後憂大

所憂為天民我久形骸外

述古

不愛昆岡玉不愛江漢珠愛已一蒼壁有之利有餘
吾生為我有其利當何如論爵不足貴論富不能喻
達性命之情順生亦自娛

荆人有遺弓索之將奚為且荆人遺之乃荆人得之
孔子聞之曰去其荆可耳老聃聞則曰去其人可矣
天下有至公孔聃得其理天地且弗有莫知其所始
堯昔讓許由朝之於沛澤若曰十日出焦火乃不息
天下既已治歸矣復奚益遂之箕山陽飲水耕而食

泊然終其身無經天下色

魯君聘顏闔踰垣避使者我非惡富貴君胡獨不舍
全生以為上迫生以為下當知得道人治國其土首
墨子歎染絲所歎一何長染於蒼則蒼染於黃則黃
奚獨染絲然染國在所當有染如伊臯禹湯稱聖王
殷紂染惡來既染國亦亡染士如孔聃死久道弥光
虞人百里奚所鬻五羊皮有得其說者乃是公孫枝
獻諸秦繆公四境不足治賢者倘不遇後世誰當知
昔者齊桓公往見小臣稷一日凡三至欲見且弗得
驚爵固輕主驚霸亦輕士夫子縱驚爵驚霸吾敢尔

所以終見之不為從者止誰云內行缺論霸亦可矣
桓公遇甯戚飯牛中夜起賜之以衣冠一說境內理
再說為天下桓公以師事衛與齊不遠安用疑客子
不患有小惠所患亡大美且人固難全用長當若此
嘗聞柱剌厲早事管教公教公不為禮入海滅其蹤
及聞公有難辭友往死之昔我之去彼自以為不知
今而弗往死是真知我非節行在所勵君心徒自欺
齊有善相狗假買取鼠者數年不取鼠畜之不如捨
相曰實良狗志在麀塵鹿欲觀取鼠能請桎其後足
桎足乃取鼠淹尔驥爇氣安得忘言徒喻此鴻鵠志

明靜院夕佳樓晉卿秘監絕宗法師同賦

西山朝氣爽南山夕氣佳朝爽人共訢夕佳吾所懷
老僧閱世久結廬深避乖蕙樓方對峙菌閣亦雙排
維南有崇阜不受烟嵐霾我亦遲暮人心迹倦鳥偕
茲焉托高躅庶與靜者諧

無汲古井水

古井何泓然不食自甘冷去來絕攀緣挽斷轆轤綆
惟有秋空月圓中時照影

惡木

惡木生道周高可數十尋當其有美蔭下足庇千人

中空狐豕穴外腐蟲蝨侵結蟠幽暗地棲宿不祥禽
雨露何其偏望之有餘陰所嘆百年物負此造物心

元日齋居

寒澗去年水冰華殊未銷亦知餘臍在凍雪晝封條
春王謹歲始由來重三朝野褐無朝次端居唯寂寥
鑪焚芳氣達榻暖木炷飄頽齡諒難制脩短寄一瓢
所願永貞吉無忝於山樵

閒止齋詩有序

黃監為張子英作記其論閒止無餘蘊予獨愛
嵇叔夜賦琴有曰非淵靜者不能與之閒止然
則閒止之趣惟靜者得之蓋予靜者之流
為賦五言一篇極其旨趣與子英商畧之

張侯溫玉質被服謝紘綺居然冠蓋徒眇若山林士
昔人亦有賦閒居因拙仕自無止水鑑何以上衆止
攬芳玩華藥探玄味圖史子孫遺以安考祥視所履
若將與日競付之當塗子

種樹

植梓五十本移松八百栽山靈借好雨似為道人來
青意爭鬱勃細聲亦吹洒松如稚子長梓長未盈把
吾衰詎能待將以蔭來者

遊靈鷲諸山洞

碎此空青寶納彼黃金龕水流澹無與石色終懷慚

顯途讓羣趨幽壑恣窮探紅泉浸短草翠雨淋長柵
靈運久成佛妙語將誰參援公亦自慰復聆勝士談
前旌因兩避後乘拙术驟周旋蟻封中丘堙皆精藍
菜肚乃知足為目庸非貪惟南粵一壑歸矣投吾簪

三月十三夜對月

幽篁不見天况乃見月色晴來春尚佳豈不有餘日
離：花氣上稍：簾陰直啼鳩夜不暝聲欲碎岩石
聞聲思逾寐悟賞在茲夕

天柱山暑飲即席次玄圃真人韻

洒地晚移席開林涼進風玄蟬有逸響青山皆妙容

時將河朔並興與竹林同沉酣非我事政須時一中

澗阿晚興四首

寒山雨連夕渴澗生微波沮洳散雞犬落葉紛相和
歸雲忽破碎返照石子波獨怜一叢菊慰此晚婆娑
卧痾畏初寒雨餘就西日松葉風漸晞竹竿暝猶濕
閑房書冊散密戶香烟集自非緇衣徒誰共開陽室
殘日留西窓窓下幽人卧不知何樹影片葉斜斜墮
秋風遽如許慎勿裂窓破使我不學人羞看隙駒過
冬菜不滿畦一雨有佳色茆栗與烏柿傍舍亦易得
魁然紫蹲鴟風雪要續食寧無一卮酒沃此老饕客

夜坐

陰崖夕暝靄燈火翳茆茨
冬足坐匡床對影見冠歌
睡思浩如雲雨聲甘若飴
新泉落澗澁寒鍾度嶺遲
貧滋衰疾態閨展冰霰期
所訢歲功成詎作徂歲悲

范侯寫白鷹贈陳太常代陳以詩謝

陳柏字新甫

范侯商皓年能寫鷲鳥樣
亭如鸞鵠峙潔白以自況
老拳當奮擊致力霄漢上
晚乃脫羈鞅刷羽氣弥王
俛首若有思長風為悽愴
柏也蚤剛狷棟隆真強項
于今亦蒼皮分老此雲嶂
幸哉冰霰餘一睨煩大匠
要非塵中物親近容跌宕
願保歲寒姿追從丈人行

范九功照磨伯母貞節詩

婦人以節稱亦既不幸已所賴彤管筆猶足傳信史
卓哉王夫人天資鍾粹美釐居四十載有誓如白水
朝廷錄貞節闕閱照閭里皇天非無私報之以猶子
遂令柏府間一代清風起

還山有作

春山雲霧裏竹樹相蒙密澗頭汲水來竹根煮筍喫
青烟出林去合和雲霧濕

九日明淨院蓮社

精藍一坐具如是法幢建香雲塔像湧花雨門徒獻

淨社得招邀比隣托嘉遯持此大同觀結彼清靜願
高座稱辯才而我忘所問惟應支道林別出逍遙論

楊彥常中第

賣樵入城去目抄黃榜回左榜見君名衰顏為之開
故都挾濤江生必名世才白屋有孝廉吾意久屬猜
看君扶搖上獲龍與趨陪朝廷好官多歲月來來來
既獲當世名毋貽後世咍

施少霞詩卷

我觀好溪詩人好溪亦好子從仙都來相見恨不早
曲局文字間禿鬢如霜草所以思廉翁持身以為寶

藏六室

六根能互用孰若退藏密了知
禪性境即此藏六室
一息一千年主人無出入
還君支床殼借我龜毛拂

遊本菴

寒林日將暮陰澗冰猶膠柴荆臨斷岸
試策獨木橈
守菴敬愛客遠屏雞犬鬧既喜浴槃深
未覺茗椀燥
釜香拆蘆凍灰熱埋栗爆杜康豈不賢
喚我曲肱覺
一適忘百慮澹泊從所好雖無剡溪興
胡然遽返棹

贈元鎮

龐公有名言魚鳥托栖止而其遺子孫亦在安而已

子有丘壑趣文弱與時背強梁方蛇吞貪黷亦虎噬
何以犯多難適為田業累深泥沒老象自拔須勇志
連環將誰解旦暮迭興廢所以明哲徒置身興廢外
賢哉蘧伯玉知非復何悔

追和陳子貞賦得窓上水影

綺䟽臨碧澗陽采薄風漪縠紗相蕩摩倒景不自持
陰沉憐霧霽幕泛濫訝魚吹所欣自然文朝徹有竒姿
寧知落月梁尚係故人思

許伯游野處

我行龍山陰委巷屋西東茆簷手可接入門忻素風

飲次袍陶列坐外圖史充自稱野處民樂此畎畝中
邈然千載上獨慕許箕公

洞庭卧遊八篇

有序

比遊惠山僧持晉卿雪竇詩闕予清峭散朗
讀之忘疲日還震澤田舍洞庭諸峯出沒户
外規一往迫歲暮適展此山存上人清遊舊
藁一一標表其勝使人神遊七十二峯之間
於是用黃公韻而采存公諸題遂成八首命
曰洞庭卧遊篇存之藁有淮陰龔聖予跋云
如古師德行道坐珍果樹下取自墜者信緣

而食不與獼猴較得失多寡以此論詩益奇
使髯龍及此倡和不知作何語以相位置豈
例以老獼猴目吾徒哉至此不覺一莞尔也

太湖五湖之總名

漾滷魚龍戲僻側鳧鴈宿併吞三萬頃寧不為小曲
唯應鴟夷子曾泊西山麓

天王寺

即桃花塢故基鑿井
得銅天王像故名寺

深寺隱桃華幽幽在山阻諸天藤蘿外昏黑路防虎
聞說春時遊辛夷花可數

東小湖院

院在山頂殿前兩小池無底
之谷云通太湖故以小名

淨坊臨絕頂陞納兩池水雲生佛足下月墮天目裏
不躡五湖根塵渴何由已

華山寺三泉

古傳其地生青蓮花因名華山有唐會昌斷碑云大殿左右多

靈泉是矣

寺以華山名一一靈泉瀉會昌舊文字毀壁存牖下
往劫蓮池開曷以信來者

黃公泉

相傳夏黃公鍊丹井水紺碧無滓

黃公鍊藥處遺并茲丘上何年一泓碧袞博照容狀
不意樵者歌猶聞紫芝唱

上方寺

寺前遠水名消夏宮故址又有馬迹橋

橘林千黃金林盡路逾僻忽臨消夏灣雲海浩如積
綺季不可追空餘騏驎迹

毛公壇

昔有仙翁體生綠毛
要皆秦人避地于此

方壇蔭竒竹儼彼毛骨秀想見黃眉公時來濯冰溜
一往不可得尚問何日又

龍洞

在靈祐觀三十六洞天第九也乘小
舟費燭炬可深入洞前有古封桃惟冬

花月著

山中春水泛蛻骨長於樹孳舟探穴口甚深不可渡
窮冬桃始華爛照珠光處

陽德館幽居八詠仍用韻

宋行在九山宮觀
隸御前者凡宮觀

皆有館以居道流開
元宮陽德館是也

得月軒

每愛龐公言人生在栖宿隨地著半椽水石共隈曲
嘉此得月名蟾光照西麓

浴鵠灣

鵠白非日浴性本好臨水雪毛不受汗拍拍春波裏
要非塵中物近玩豈得已

來鶴亭

孤亭負蒼壁羣木帶清瀉時有羽衣仙適從青冥下
此來知為誰當為有道者

拜石廳

石當米老拜寧為簪紱阻望塵何人斯彼為畏石虎
烟痕一枝足牛氏甲乙數

蓬廬

一蓬僅蓋頭坐我浮槎上夏木有奇陰春卉無俗狀
園鳥何許鳴侶荅漁樵唱

藥井

甘泉既泠冽靜界乃深僻石礪丹砂窖露鬢莓蘚積
有瓶居井湄飲者視其迹

梓樹坡

短坡常側足，蔭此嘉木秀。接葉幃斜暉，卑枝拂殘溜。
巢鵲歲來哺子，今看又。

黃篔樓

黃篔織文浪，丹梯插珠樹。時就北窓眠，遙見西泠渡。
何如風篔嶺，曾曾聽松處。

魯東泉學士以多病故人踈為韻賦詩五章

見寄依次用韻荅謝

餘見五言律詩

幽憂緣底事，終年常抱病。閱世悟炎涼，觀物感衰盛。
皮裏有陽秋，目前無凡聖。嚴霜凋衆草，松柏見半性。
古人誰復見，但見新人故。昔日衣錦城，于今鐵鑪步。

試看明月輝不礙浮雲妬誰能強咲面百摺如嘗醋
日覺死生忙回書四韻予豈効寒山子者

人生浪自苦古今無一了雞命湯火間喔喔猶戒曉
預憂復何益轉使髮白早不如噎酒糟糟丘無壽夭
金陵懷古

金陵豪華地鉄冶久寒灰大江流日夜山作飛龍回
簫鼓有遺音梁王安在哉

元鎮為作天池石壁圖

嘗讀枕中記華山閔中吳神泉散其顛青壁繚其隅
春風四山來羣綠平分扶羽觴曲折行浮花與之俱

采珠蹇薛荔洗玉弄芙蓉聲叟頗好名石窪作魚湖
鴻乙志艸堂桃灼遂成圖而此滌煩礪閱世如桴蒲
鼓興雲林子盥手為我摹居然縮地法挈入壺公壺

醉書贈張子昭

我愛張雪崖崖雪白於齒頰我粲然咲留我隱烏几
家貧徒四壁四壁面圖史虫魚斷編簡貫穿窮首尾
豈無魯諸生安足與議耳或追西園蓋或曳東郭履
或倚歌姬筵或走賈胡市見我相媚嫵入俗諧鄙俚
楚狂去已遠恕先差可擬有子孝且廉異日茅季偉
我非郭林宗知人乃如此此詩足猶徵不信如白水

和楊廉夫游虎丘仍次東坡先生韻

日出東海頭，席氣踞茲嶺。渴心望氣往，鮮后轆轤井。
寧若軍中拜，奔泉酬老耿。莽丘專鬼物，陰壑雜蛇黽。
魚腸卧池底，百鍊豈重曠。似聞神物化，後日屬吳猛。
怪蟒既五刃，大道孰爭騁。我行須人扶，鳩杖漸祝鯁。
小吳不滿眼，坐納三萬頃。化國方日長，霸業久冷。
淞水翰歸吳，愚溪柳遷永。吾非斯人儔，短句惜流景。
茶烟寄禪榻，弄我鬢絲影。散人初無號，奚必煩上請。

適得稚松一本，絕竒。因裁坡詩一聯標之曰：

霜根雲蒼皮，護玉誦此語已足。想見且賦。

詩以寫其形似云

松身不盈尺鑿山曰獻根其根遂三义鬢結不可分
歌傾為盖曲蒼翠若雲屯藉以丹砂沐盛以雪浪盆
小作千歲期與尔共朝昏

天目蘊靈秀石精霜露腴群松有異產夫豈擬拘株
鱗鬣具蜿蜒形模陋侏儒眇然卧一壑氣欲凌千夫
萬牛不為挽俛首歸吾廬清風莫逆故摩撫蒼髯須
砂床填其根虹采錯珊瑚伏靈潛其陰千歲名江珠
鍊脂服日覆命與天壤俱維此至神物以養山澤癯

次韻錢舜舉題自寫山居圖

秋風動岩樹歸鳥何其翩我思岩中人可以樂忘年
夫君本詞客畫手故作妍吳興圖畫數肯為時好遷
上岩雲積雪下岩水鳴弦展弓纜尺許坐對兩忘言

南窓對客

旦寒坐南楹願望朝日昇須臾向中晷虛室和且明
一觴未及酬簷影倏西傾人生會有歸天運且無停
自非契叅同何以反頽齡

冬至

閭閻變鄉井寧復短豆事每惟節序及轉歎風俗異
追言竹馬懽久忘芻狗棄尚憐半簷日從我作和氣

同履迎長候老乃日短至政使毀乾坤此易未嘗廢

蘭雪齋

謫仙有妙語清風洒蘭雪高懷千載下子獨慕芳潔
春冰斷瑞花晨露滋奕葉端居味道腴光景庶不滅

至日齋居偶題

積福如積金歲月知幾何棄福如棄土享用惟益多
此積無窮已裏蹠出淘沙彼棄不知覺土崩方塞河
用示同學人行止勿蹉跎

計籌山四詠袁安道請題用黃晉卿雪竇三

韻

東隱

華房人罕至時許白雲宿肯信搏桑岸近在封禺曲
隱者所盤旋坐斷東山麓

雪齋

騎驢吟雪詩煮茶煎雪水何如掃一室置身虛白裏
君家有故事高卧殊未已

觀泉軒

石橋束飛湍至此方快瀉
匡廬有三峽出我枕席下
自非醒眼人孰是憑闌者

環翠樓

丹樓出林表四顧極幽阻群峯所環合白晝疑有庸
翠氣深復深曾疊不容數

次韻僧易道見投

秋陰稱幽抱未覺相戰勝即事表空寂況復臨水鏡
安得寒山徒共此林下詠尚餘一句子付汝親究竟
開元池上匹鳥久孤去數旬矣當午與一雌
俱還對戲清波若有得色回賦一詩紀異

把酒臨清池孤鴛何自雙綵翼孑然去白頭歸有將
綢繆若素好眷盼不能忘戲穿葭菼荷芰與迷蔽
始結鸞鴦盟終黜鳧雁行有情金石弊生物詎可量

君不見黃鵠下太液皇家此樂殊未央

題息齋竹卷

李侯製竹譜畫法論毫芒晚乃與神遇脫畧驚大方
目中無全牛曾次有篔簹此圖遇真識吾詩其併藏
李仲賢澹香亭

齋居玩芳草佳花鬱成行採服以延年壽母樂且康
金昆玉季間祿隱聊倘徉惟應澹中味書傳自生香
舊和喻千岩游南山五言追錄于此時倡和
凡十三人見龍井志

把茅結方圓辨子所回向至人了一榻寧假棟宇壯

佳哉南山氣浮我眉睫上
敞廬篁竹外有路入雲嶂
田父昔與隣春哥聽成相
柴桑不作遠日夕如在望
清譚付公等歲月增恨悵
蜜殊果能來為割山蜂釀
白桃花此予四十年前之作
得於仇仁近集

中

離離倚風條剪剪渡江葉
天天綺靡馥朗朗有姪節
春空妙質迴微雨皓彩曄
仙李如有素董杏羞與列
奉避輕薄名偶同艷陽月
華觀固不察諒與玄賞愜
醉里王國輔以樵雪孺請
賦詩

昔聞蕭侍郎住在郁木坑
負薪時入城徒跣雪中行

茅茨無炊烟路絕澗谷平唯見大人迹步若飛猱輕
泉塘有竒士希慕古先生求之不可得尚愛樵雪名
後圃游洞臺稍聞樵斧聲行尋黃獨苗遲此快雪晴

東坡笠屐圖

步過黎子雲不憶風雨至借渠兩不借一笠蓋天地
海上得生還所養浩然氣束帶立於朝毋使龐也吠
撫州僧古清畫龍作雙劍圖求一詩虞公有

叙

畫龍畏真龍此語聞已熟真龍豈常見畫手非一族
阿師何善多神物如豢畜金壺酒一滴海水為翻覆

向來董羽輩斯藝亦云獨龍眠早畫馬恐復墜馬腹
晚更寫佛像滿月照岩谷師何專于龍意若龍眷屬
龍文且成佛回向恐不足請寫雙樹林長禮金仙足

西林寂字韻

龍井據上游我居城右僻湍奔石與鬪雨響山為寂
偶然共禪悅詰旦風挂夕勿笑泥塗間常有大人迹
是身

是身如浮雲群遊天壤間悠悠眠食物動靜莫相關
自從知有此受用千劫間飄風鼓海岳斂迹無所還
送性天然集慶懺首六人分韻得華字

辨才歸隱地聿為名德家若徒吾與隣過額輒分茶
一聞東掖香樓閣徧塵沙西山大招提幘席天雨花
夕誦燈燭繁晨興隨鼓撾勿厭與衆勞縱逸聖所呵
出世真細事此事不容誇不遇雪堂叟終遇老毗耶

本無秋海二上人鵠灣月夜彈琴

五尺青石床三面樹蔭遮拂我黃金徽露氣薄袈裟
肝膈既冷冽不可加以茶一杯彈一曲酒盡月西斜

生世

生世乃如此太息將何成一刻使為吏百年失所生
頽然老黃冠何者身後名常持一杯酒不復向公榮

盱江李貞白胥林大持黃殷士詩來見比還

用韻以送併酬殷士

拏舟指靈岫濯足戲清波漁釣皆吾徒耳熱叩舷歌
秋水明於練秋雲薄如紗翮兮兩黃鵠過我雲水家
因之尺素書寄此八月槎起視鼓桂枝兩涼綴金花
履霜懼堅冰歲月走驚蛇黃公商鵠流茹芝殮日華
風燈無水焰能施重幕遮將求歲寒子飛心隨落霞

南岩分韻得陰字

西南一丘壑良會始自今既許陶翁飲復招穎師琴
淡泊適相遭彼此暢冲襟豈無金谷序何足疑山陰

歸雲亭為竺初僧作

青天妙湛躰白雲無所住於無所住間信有歸宿處
卷舒不盈握要以無迹故開戶是青天閉戶還春雨

李寧之饋石芥

桐廬有石芥托根至清冽蔬譜久著名未獲躬採掇
故人遠見餉硤岳涎流頰端疑石髮瘦稍異萼縷滑
雋永求正味似為鹽醢奪不然山澤曜迺讓薑桂辣
豈非時俗氣草才為改節柔和悅衆口甘與韭薤列
吾寧事辛苦還山拾薇蕨
勾曲外史貞居先生詩集卷之二

勾曲外史貞居先生詩集卷之三

七言古詩

仙都山黃帝祠宇

軒轅去時昇鼎湖羣臣蹠弓龍垂胡祈仙之天有非
無何季配此名仙都一峯削立天柱孤曾有風墮金
蓮樹玉女洗頭水一盃淪沒九鼎談何迂百圍大木
如插須鈞天往往聆笙竽安得飛行身不劬大坐其
頂頰八區却垂錢鎖招吾徒

延陵公承慶堂詩即龍虎山獻玄教大宗師

大江蒼方元龍虎輔元之家百神頰望拜受釐若稽

古上清真人閱衆甫新宮潔齋導天語紛雲郁霞錯
承宇虛皇穆然陽衛武左颺右歛降軫羽縣鍾鏜鏗
迅擊鼓赫金祭服赭朱戶雙珠月明帶寶璐挾以流
黃玉櫛具既竣大禮私事舉吉日宗族奉爵俎青紫
曳地簪綬組魏張代劍新捧土饒國開觀治宿莽報
君親師物咸覩撫已一念或未溥西壁考書玄範府
寒冰層陰發春煦日幽若明沐仁雨道德大非方仙
伍月佩六印非迥取持旌趣召迹旁午下土滓塏寧
久處天關會規足蹈矩願天顧地多忝稔畢志萬年
奉明主小史作詩孰敢侮吁嗟厚德番之祖

太玄天師畫大松命題左方

龍身百圍冠玄鍬垂胡帶劍衣文鬣歛然遇之如泰
山隱入雲綃玉女函畢宏走觀履折齒禿筆韋偃不
敢睨壁張木怪懾山精一竅辟歷風火生非枯樹賦
神異經

句容陳仲揚詩送淨月游山次韻一解

陰崖顛風無時興篁竹壓地席晝行斲冰積雪卧空
谷春至稍聞禽鳥鳴華陽南便洞窓小香烟西放峨
嶓道神僧問訊破孤寐把臂入林一傾倒帕頭蒙寒
驢背馱泥滑穩如杯渡波寄謝少年王敬和獨行其

如沙汰何

食芹

有序

碧岩下澗產芹今雨實繁谷水瀏如霜露既
降採芹之美不異始春賦七言為木食張本
去年石田脫赤旱今年行菜潦沒肝何以療飢無紫
芝一味青芹生碧澗空谷從誰種香草有魯東家水
如泮朝吹芹蘢齒牙響暮作芹羹吐嗟辦記攬來燕
動春泥看茁秋根唳新鴈采采青絲八千尺泉上落
英為老伴愛日心同野民獻家園夢想於陵灌更問
天隨二畝塘生計相依歲年晏

鵲華秋色圖

有序

吳興公自序云公謹父齊人也余通守齊州
罷官歸來為公謹說齊之山川獨華不注最
知名見於左氏而其狀又峻峭特立有足奇
者乃為作此圖其東則鵲山也命之曰鵲華
秋色云張雨賦詩于左

弁陽老人公謹父周之孫子猶懷土南來寄食弁山
陽夢作齊東野人語濟南別駕平原君為貌家山入
囊楮鵲華秋色翠可食耕稼陶漁在其下吳儂白頭
不歸去不如掩卷聽春雨

梅竹雙清圖

竹外一枝斜更好自有此詩無此畫承平公子翰墨林寫
影圖香戲春夜分明敲弄明月珠賈胡不識千金價
黃子久畫

中峰大面削鐵如巖岫綺錯非一途上連閣道傍屋
廬尋窗數戶愁崎嶇米顛所製三尺圖筆力視此微
麓踈閨苑之臺遲子久不歸正為松江鱸

題江鄉漁樂圖

水翠紛披秋暈三
淑靄汀煙帶墟落廣居安宅一蓬
了行人應羨漁家樂風波終要茅三間柳根觀書意

自開滿眼太平雞犬靜乞身老向畫圖間

雪中騎牛謁米元章墓

海岳清士陳太丘雪中能披鶴氅裘千斤擔持穩如
舟高興壓倒王子猷丹陽郭外一杯土云是中岳外
史之虛墓百年誰掃斫山園不獨匡山讀書處牛角
政自多漢書縣以酒瓢若垂胡忍寒再拜僵僮扶空
谷置我一束芻淨名之天方燕居席兒亦咲迂叟迂
江南滿地麒麟冢曾洒清明麥飯無去去南山煮白
石甯子奚為相齊國

早春對雨雜言

寒谷望春如望赦
兩雨風風慙相味
床頭敗絮未嘗
溫石上瘦花渾欲謝
三時儘辦禽鳥鳴
合澗助為風水聲
白水田頭漫無路
老鴉種麥已青青
朝晴獨見扶犁叟
人生合作扶犁耦
不須識字只耕田
酒杯也到扶犁手

次山人韻

不能誦詩送龍鱗
不能劇秦而美新
既黃其冠豈無用
不能賣符稱道人
燕鴻似避春秋社
鹿豕與結東西鄰
低頭老鶴同飲啄
世網難嬰當自珍

畫雪

有叙

蔡天啓詩云收得三茅風雨樣高堂六月是
冰壺蓋其善畫自稱道如此辛未十二月廿
八日大雪戲作畫雪一章

絕咲丹陽蔡天啓愛寫三茅風雨圖三茅得雪真無
價紫薇閣中不敢摹小峯如玉人絕頂銀橋孤白龍
妥尾寒垂胡龍髯膠折青珊瑚營丘索酒乍槩薄老
范却立為長吁仙人郭忠恕縑車網筆畧元符瑤臺
劃然三百疊金殿玉屏交網珠天風颭輪凍模糊顛
倒元氣朝香鑪半空驚起趙齷齪鐵冠墮地為於菟
陶塘三館間研粉蓋屠蘇王維公寫蒼筤節韓生貌

得詩人驢畢宏韋偃最雄傑一掃晉朝獲栢枯古名
畫史天為徒安得諸賢折簡呼昌黎雜記政如畫點
綴雪山還老夫不信賞心亭上看袁安一片今在亡

趙涼公瑞瓜圖

菌房焚香披瑞圖中何有有嘉瓜五跗比翼駢十
頭此圖發瑞涼公家公由鼎鉉致師傅功業既備爵
土昭閒居秣陵思無邪几杖所至為著龜五色下被
厥壤華在德為祥僉曰休慶長綿綿德不孤衍蔓剖
牙皆公侯味則消煩壽而腴曰時進退與道俱園公
之和是作歌

浚儀公鳳頭駘圖

鳳頭之駘高八尺天上龍種來西極開元四十萬疋
馬此馬入貢初未識回紇使者行且牽織罽覆之如
絳烟王孫何從得此本絕筆韓生五百年

丑十月日長至獨游郊圃獲螭花朽梅株詩
以志恠命題曰古螭辭

至日商旅戒不行我乃行藥隨支藤牆東負日橐駘
叟指我枯枿見未曾誰截猛虜頭上有蜜花如凍蠅
初疑南華老圃楸拘株又疑絳州守園胡人鬚山蜂
使令兩童子一抔舊土歸擔簦拾得僧虔鳳凰翎玉

刻天寒隨指凝不然石炊家爨餘滴瀝遂使楮生
驕矜黃香古落蘚白室曉熏蒸吾詩有味聞竒崛一
啖飲水方曲肱

烟痕石

廬山一峯似香鑪我有峯石香烟孤微風裊烟宛而
舒縹緲意欲翔空虛竒章公家甲之上不信請視烟
痕書

毒熱以松水自奉

青松一株白水一盃水寒而澈松掘音兀而腴層冰
絕壑不可到身外萬物皆洪鑪保此清靜正惟與二

物俱腴若可殮澈不盈齮匪越几席為余隱丘音虛
乃不知予之悅松水而反遭其以予為娛乎

題燕文貴江浦歸帆圖

右圖羅大監得於燕都持以南還翰林待制
虞伯生題長句其上羅既歿余遇圖於錢塘
遂次虞韻書于左方云

夢載神山飛左股又疑石墮星如雨決滸浮雲接混
茫滿意遙峯專媚嫵陰崖連林子午谷洪濤隱岸瀟
湘浦浪迹先生真慣見持以遠游歸玉斧柏舟本具
詩人興藻思孰識良工苦雨暗筇筓日之夕水闊蕪

葭路伊阻燕家當時彌絕景空餘粉墨悲黃土精微
擬並江都郭麤踈直唾長安許一從玉匣變坑灰或
散玆圖要海賈昔唯羊碑能墮淚今豈貂璫獨懷古
羅君少日官黃門御題往々巾箱貯北去心搖漢日
縣南歸骨冷河冰沒三館瑣魚隨壁梭曝涼故事猶
能舉荆玉化家作蕭寺私憶金波山數堵翳翠歌成
當自寫摘瓜圖在從誰語樓船萬一有神藥未了人
間一炊黍晚知書畫真有益正用此意聊相與斷縑
流轉三百年得失尚關榮辱主從知玩物亦偶然還
我長鑱投老圃

方壺仙人山水圖歌次虞翁生韻

廿載與別青城翁迹聞壺子忻相從倒披鹿裘躡芒屨長揖門前華蓋峯手提幃子雙松樹仿佛韋侯筆踪古八分為寫山水歌翁真曾到方壺處方壺出雲雲更多意中摸索如翁何杳冥獨見小真闕宮殿曾曾如馭娑恐似幽經累王遠日中不取驚雷電方丈西山水際九千丈歸來莫怪濱洲淺

次韻鄭明德徵士有懷王仲德長者

有美一人陽羨陽玉立諸郎天所償君家世德三百載尸祝當有一瓣香我嘗句曲道溪上往覓故侯環

慶堂不問主人徑看竹竹間好鳥如笙簧君方沐髮
起延客口能誦我凌雲章旋張玠圖娛坐席別置華
尊開酒場藕花玲瓏水堂夜風連雨葉爭琅琅至今
欲往便羈絆浮埃聚散非可量歸來錢唐一千日飲
酌湖水不滿觴經營屋廬蟻旋磨被服詩書鶴在梁
聞君將理畫溪棹尋我會來丹井傍論文喜得鄭徵
士神光樓外菰蒲涼不愁夜長更短只恠同年青
鬢蒼

趙仲穆秋曉晴嵐圖

白雲不來秋向曙寒旭未開陰似暮曾巒疊岡如肺

附空翠烟霏莽迴互深林慄冽還悽迷沮洳略約緣
東西丈人荷鉏仍佩犢天姥過嶺猶聞雞訪水尋山
足力煩暮年借盡醒心魂董郎仙手不可作祗今唯
數趙平原

贈吳孟思

篆隸相公屬諸李于今濮陽數吳子斯冰籀法神授
予潮也八分奚足儼昔年胡公汲仲父為子長歌書
一紙子今最藝何可忘喻以識路行萬里故廬隘巷
屈長身石經碑版相填委祝融回祿端相子空諸所
有斯可已朝廷甚大秦漢小遲子銘鐘勒黃耳

聽濱洲仙人鼓琴

葉公耻畫龍學道龍虎山彈琴鳳凰聽百鳥飛集青
琅玕上清外史贊咏之而我聞之心益閒其音冲且
融其器有道出無窮得非零陵湘水西震餘石上之
枯桐為我一鼓湘水曲曲未終鳳凰和鳴載邕邕忽
然嵇康顧我咲蘇門真人甚玄妙向來荅子以長嘯
葉公擁琴去莫追獨夜冷々山月照

虞公為海東之作歌舊矣惠之赴吳縣簿俾
次其韻送行辭之不獲遂倒用韻一篇以塞
責咲云耳是亦例松陵倡和也

海東之玉關之人奈子何一朝趨試當大廷搜竒抉
秘如縣河曾中二三策教憤精研磨中山兔毫渴濡
滌綠文巨研出大沱

御卷足揮霍如見山之泰華江之鄱紫髯長戟凍不
折濁流鼓柂冰義義得官固好好東之情最真遂使
吳儂日相親不誇文字雄退與寒士相推尊啞哇鄭
衛非所云闔閭城邊種楊柳柳江柳子子亦聞我有
刻玉書願與窮朝昏子若脩之可凌雲不廢世間功
與名况聞子弟俱策勲一門科第凡五人瓊林之中
翔且翔如此文文而章章所以青城樵者有歌曰海

東之兄弟三人如鳳凰我歌曰二鷓亦復鳴朝陽載
歌曰二鷓亦復鳴朝陽

建鄴青溪堂

青溪一曲清如許羽人築堂據溪澣簷間倒景浴朝
暎鏡裏圓文寫春雨碁聲時驚白鳥下厨香日采青
芹鬻寄語平生孔稚圭鐘山草堂元不數

贈常廉使道夫

司馬大人奉子虛大人政尔山澤矐先生堂堂出關
陝列仙之儒乃其徒泰山行車厭盤詰東海投釣嫌
窳污三臺搃畏真御史一世獨為道丈夫 挽長矢

射貪狼復操快劍殲蠱狐目無全牛神轉王妙在善
刀而藏諸衣冠制度化夷獠巾緝給侍憑僧雛義眉
看雲西崦迻洞庭弄月君山孤老臣再命三品服謁
告倏尔觀東吳驀過城邑訪岩窟玉川破屋驚長須
雨苔攝衣初斂衽風泉繞榻同跣趺昔從受道依勝
力今許問疾隨文殊為憐魯鈍暗摸索脫手解贈衣
中珠凌晨游興不可遏武夷之君人得呼時當兩涯
秋水至天吳海若為前驅便從九曲上天去先生騎
龍我騎魚

玉笙謠 贈陸德瑞

我有紫霞想愛聞白玉笙縣匏比竹無靈氣崑丘採
此十二莖鳳味銜明珠皇翼排素翎荷華陸郎妙宮
徵子晉仙人初教成月下吹叅差羣雄亦和鳴緱氏
山頭白雲起七月七日来相迎長謝時人一揮手飄
下滿空鸞鶴聲

古洞簫引

慈姥山頭有竒竹般匠遇之裁紫玉慷慨優柔徐度
曲空洞之音何肅肅此物先時隨伍負百金之劍久
離羣古人隱忍成功烈末世哇淫何足云

題畫扇

翠水丹山氣磅礴幾疊香痕經手握何年破鏡飛下
天吳松水剪刀薄江南寶繪多遺餘王孫不歸恨
薜蘿薜蘿消歇秋風起班姬為我歌烏烏

次韻虞奎章懷秋泉真人短歌贈其從子戴
士安元章研山其家所寶

曾見研山如見畫蒼龍一泓在其下真人氣岸雄且
堅此石精英可方駕掉三寸舌帝者師入不言竹出
不辭手把瓊芳迎太乙江南草木回春姿更借龍泓
涓滴水天藻亭中筆新泚題詩何必見安道從子風
流政如此

次韻率性來山見貽之作

南峯後靈石前嵐霞積絢爭春妍貧家客來淨掃地
亦有一鉗紅杜鵑東坡七過山南鷗山人能記坡翁
語君方騎馬聽朝雞為我入林來聽雨兩聲吹斷聽
松聲怪石長松為友生憐君慰我支離者不飲向人
空復情我如病馬離群去君如伯樂能生顧羊群好
在金華山夢裏相尋猶識路

唐宮女削瓜圖

避暑宮深綠槐影水浴龍鱗金薤冷試呼碧玉破甘
瓜味較玉魚津液永唐宮佳麗絕代無唐朝女媠何

可誣誰謂丹青不解語黃臺聞有摘瓜圖

贈顧生書其松月軒壁

昌門舳艫雪鴻迹
送順風前俱過客
君家住近古城隈
市聲書聲一簾隔
長河夜靜開冰奩
微風入樹梳蒼髯
歸來倘有張翰輩
為掃君家松月軒

客有具舟邀遊靈岩上方一夕風雨明日以詩奉廉夫鰲頭為更張其席

山水皆久要一旦隔風雨卧遊政尔佳奚非濟勝具
水剌山殘如我老觸目興懷殊草草不如綉錦坊中
聽雨樓取醉都忘山水好鄭左不來今雨多張雪狂

談奈尔何便從楊君借女妓澆我十分金叵羅絲竹
由來不如肉不聞風雨祗聞歌

太白像

青綺帔綠玉杖望見九疊屏風上翻如游龍不可攀
已在峨眉山月間

夢仙詞

蟋蟀不識蟠桃樹青鳥飛來賞燕頻半核才盛一升
酒弄花已是八千春金盤枉賜漢武帝青腰先送魏
夫人

墨龍

高昌世子寫墨龍此龍乃出開元東井中東井水與
天河通龍下取水遺其踪道人識為黑帝子逃入世
子之筆鋒井頭半夜飛霹靂元氣淋漓雪色壁一鎖
銀床五百年攪點目睛生羽翼

惠山茶

水品古來差第一天下不易第二泉石池湯流語最
勝江深湍激非自然定知有錫麓山腹泉重而甘滑
如玉調符千里辨淄澠罷貢百年離寵辱虛名累物
果可逃我來為泉作解嘲速喚點茶三昧手酬我松
風吹兔毫

夢中書所見

青壁倒懸五百尺石庐居中纔丈餘洄潭斗絕不可
渡望見玉床安素書安得半瓢青飴飯長年為掃仙
人間

陳信大拙陳孚小拙書二拙傳後陳信者古
愚別号陳孚繹曾也

大拙先生拙於官小拙先生拙於言拙官太常新致
政拙言文史工討論陳信可名為大者不能自比魯
仲連陳孚所以名為小老死不得歸田園

製筆范養素乞詩為作長句

多謝中書君伴我此幽栖蘇仙出語仍自咲我同此
好仍非癡下岩櫜壁如削泥三韓璽紙光陸離惜哉
未覩柳筆樣圓如截玉銛如錐吳興老范子傳業拔
毛剪鬚搜鼠狸精心妙藝出流輩姓名依附黃金隍
迺來書法又一變八分隸古方趨時我書汝筆不相
稱漫烏衫袖同兒嬉

陸子方寫小像于松鶴畱要予賦詩

愛松徧遊天目塢好鶴為覓華亭侶松來映戶鶴歸
籠十丈黃塵隔環堵紫髯蕭蕭共掀舞仙骨稜々欲
輕舉巢居閣下一片雲隱居樓上三層雨不似君家

道氣濃藥籠陰功何可數三壽作朋入閣畫畫出分
明養生主

王獻之保母帖

興寧朽骨隻松下經過無人知下馬斷磚破硯出黃
閉乃屬錢清同姓者文字刻畫殊草草熟視姿媚仍
蕭洒苦訝此磚八百年不見羽陽銅雀瓦

李雪菴學士寫竹枝

昔我入

朝皇慶初及識此老蒼眉須殿頭金榜插鼻鼻海底
鉄網收珊瑚洋州竹枝氣相敵涪翁病書誰足模金

色頭陀去已久
猷花還自有門徒

陳賢良騎牛歌

廬山高哉多異人
黃犢能令駘馬避
御史孰若極諫
科陳公獨行非求異
一奮而斥斥而死
哀文尚見東坡祭
所以陶公遁齊梁
畫牛籠絡黃金轡

高尚書山水仲川第請題橫幅上

我識房山紫髯叟
雅好山澤嗜杯酒
政事不減李長源
畫中乃復稱仙手
規模北苑出新意
却顧巨然媿母醜
此畚仍是江南筆
米家父子應鉗口
卷箴閱歷五十載
雲氣依然投戶牖
剡藤何知得所托
一代精

靈豈枯朽南山弊廬畱寫徧壁掃黃泥無復取吁嗟
大賢不可作老矣向來牛馬走舉圖還君百憂失卧
聽松風搔白首

送韓景賢學正還京口

李侯為郡廉且慈江左列郡諸侯師上煩

天子賜束帛宰臣為撰學宮碑廣德韓君貳學事來
杭向我言如斯又言小民皆足食翻咲推官無馬騎

推官張率性也李
侯控官士寧也

長平戈頭歌為蘇伯脩賦

野嘯臺前看落日野人鉏地戈頭出持獻相君此何

物土蝕金精血為碧咄哉地近古長平尚憶秦人坑
趙卒倒戈陸沉數十萬武安引劒嗟何及用兵之事
多好還區區尚使秦人憐直須亭長提三尺掃蕩風
塵四百年

雙鵲

三株喬梓屋南垂大葉新條青陸離一雙乾鵲定巢
處開樓近接朝陽枝我辭深林悔一歸閉聲垂翅那
能飛爾禽何事亦來此餘子未必真忘機

詩悼上清外史

玄卿難再得本自餐霞人高懷獨超物洞鑒亦絕倫

君自江東我吳下早歲聯翩侍金馬御榻賜書几一
束仙苑偷樗動盈把紫虛元君之玉訣青城先生教
我者感君多道氣探懷為君寫學士承旨平原公許
我與君楊許同一時標名兩外史羽衣白茅並下風
我還句曲餘廿載君乘輜軒歷烟海歸錦橋西結草
樓樓中襟被長相待風烟山水共追尋福臨洞口話
離心年深書字化為碧白首蒼茫成古今聖井山崩
數千尺君從群龍去無迹困頓鹽車篠嶺頭此日思
君復何益

集太白詩語酬僧淨月述楚辭

主人碧岩裏為予話幽栖真訣自從茅氏得風流還
與遠公齊滿堂空翠如可掃而君鮮來一何好白玉
麈尾談重玄琉璃研水常枯槁蒼々雲松拂彼白石
世人聞此皆掉頭就中與君心莫逆袖拂紫烟去空
中聞天雞借問蘇耽鶴早晚向江西

集句非古也而馳詞抽思者時復為之于以
見古今聲歌之一致物我情性之一源也此
詩太白語而從橫顛倒無不如意神機妙用
若古未有此語而自我作之者雖太白復生
亦無以議貞居子矣昔太白之交元丹丘不

翅膠漆而僧行融亦嘗頡頏飛霞佩而著名
籍中寡之數百年此意猶在則貞居殆非適
取而淨月亦宜受也觀者其徵予言中山李
懋子才跋

句曲外史貞居先生詩集卷之三

勾曲外史貞居先生詩集卷之四

吳郡海昌張雨伯雨撰

吳郡徐達左良夫校

五言絕句

玄洲十詠

菌山

靈丘狀三秀紫雲覆其顛
易我朝生質閱彼大椿年

羅姑洞

九疑得道女受事易遷家
詩贈金條脫人逢萼綠華

霞架海

日芒架金色虹梁飲鳳阿直把天孫袂烏鵲詎填河

鶴臺

靜夜蠅靈風神君語帳中至今雙白鵠時下五雲峯

桐華源

華林清散景丹水碧凝脂落葉秋無數宜都嬾寄詩

玄洲精舍

李基遺故鼎趙嘯絕風雲悠二千載下更復屬夫君

紫軒

玄窓太霞炁赤書洞古文借問軒中主莫是紫陽君

火浣壇

真火本無候真人自出現問掃劫灰餘幾見紅蓮變

隱居松

露壇栖妙蔭仙籟降靈芬何時三易帔重拂兩捎雲

玉像龕

瑞儀溫比德寶帔曲流光稽首大司命料理住金鄉

東漢高士詠

有序

八月十五夜風雨淒其慨念東漢諸逸民取
大蘇公中秋冷坐一聯賦小詩十四首韻其

下 劉翊

子相足周施破此家產豐陰功誰為書得來華陽中

封君達

入山服黃連還鄉騎青牛借得五岳圖一去三千秋

梁鴻

侯光與德曜布衣心取二長夜五噫歌誰念空山冷

嚴光

難與助為理聊復共偃卧文叔迫我甚誰云犯帝坐

左慈

老瞞實雄猜迺忌仙者徒魴魚既可鱠蜀薑不可無

向長

貴誠不如賤富誠不如貧自無子平易孰悟損益因

費長房

贈行青竹杖壺中有餘地如何一升酒盡日登樓醉

范丹

破甑久生塵短衣不掩骭還渠六斛麥所拾已雜半

龐公

卧龍拜床下劉表安能屈照見采藥踪猶餘鹿門月

薊子訓

欲追薊先生白雲迷其方驢鞭不可執壽與銅狄長

王喬

吹笙古仙人政要玉棺埋借問雙飛鳧何時離縣齋

韓康

公是伯休耶賣藥價不二却問奪牛翁徵君當過未

矯慎

養壽慕松喬潔已配箕穎穴居七十年娶妻終不肯

法真

逃名二我隨避名二我追去二南北山與世從此辭

古意

吳綾光纒二織文鯨掉尾美人不敢裁恐觸波濤起

墨寫四花

梅

墨池初月上雪嶺又春歸翻咲花光老鐙前指影肥

蕙

一幹香無柰何須百畝繁光風稍披拂書帶共翻翻

水仙

月珮聲都寂風鬟影更長龍香能幾許熏徹水仙王

瑞香

佛帳收餘馥廬山社裏來睡中香不歇消得錦成堆

墨花四首

杏

微雨濕芳郊紅樓日未高樓前人繫馬初見出牆梢

桃

新粧似學啼為染黑燕支却憶天台路林深月暗時

菊

時菊三千本無如黑菊奇誰將霜下傑移近右軍池

萱

最愛宜男草叢幽翠作圍日長人倦繡蛺蝶上羅衣

題扇

山禽寒噤啄風篁吹雪碎蒲葵不待秋已想堅冰至

五言律詩

暑雨大快

孰不矜高潔吾寧困鬱蒸眼前唯吐_二身外付騰騰
地籟超聞樂天河借踏冰快哉風雨意奚獨掃青蠅

積雨

飽聽諸峯雨閑題七月詩水深荷意怯田冷稻心遲
鼃黽陰爭盛蛟龍勢亦隨蒼茫不可問默坐看雲移

題山水便面為柳道傳作

篋笥秋非遠塵埃暑實煩遂遊千里目稍借一涼恩
僧閣延旁嶺漁梁跨別村誰能從象外試覓武陵源

碧岩洞

大木垂華蓋石間光景分
丹名深刻玉翠氣直排雲
隔沓南便近香烟上界聞
真人歸蓋竹安得把飛裙

昭明臺

帝子登遐久令人發古懷
書臺存爽塏學海黜滄哇
草帶緣空碧芸香染斷崖
子雲有竒字吾欲構蕭齋

咄咄

好鳥猶求友中年轉畏人
吾寧廢丘壑子竟委風塵
不厭聲名大祇疑消息真
由来嵇叔夜未悟火傳薪

雪作

雪作衆禽驚窓幽乱霰鳴喙然身獲落莫矣歲崢嶸
松水聊娛拙乾坤苦忌名故人不相貸書札到柴荆

又

落木從風靡支流趁谷斜山空不須說歲去若為遮
飢鸛搗窓紙寒魚灑雪花推書祗清坐席暖到昏鴉
齋居偶興

絕澗多靈石中開小洞房醉醒依竹素晴雨看梅黃
樹暗鶯聲澁岩虛水韻長未能趨賈馬自是上羲皇

午日用韻簡楊廉夫

客有擁琴至吾寧折簡招足音垂谷口雨氣截山腰

酒情紅泉寫花為絳節朝不嫌泥濘極一舸段家橋

崑山袁氏高節樓

壽母初黃髮諸孫及壯遊人生唯大節海上見斯樓
愛日丹梯近仙雲畫棟留憑高一俛仰足使懦夫羞

挽張主簿

字升器循王七世孫

南渡衣冠盡惟公享暮年王封門闕重儒術子孫賢
愛日依華屋悲風卷素清朝開史館耆舊入新編

吳大宗師挽詩

饒國恩封大番君世德優恢然王佐略渺矣帝宸遊
壽櫟終千古河岳闕一丘及茲玄運厄寧免杞人憂

五言長律

元日雪霽早朝大明宮和辛良史省郎二十
二韻

纔設中廷燎俄看密霰飄歲開環甲紀星動指寅杓
鳳集天門榜珂鳴月殿橋卿雲同四表和氣洽三朝
陞級肪初截雲層玉旋雕勾陳分綵隊步輦簇青腰
積屑承盤重吹花到笏消透迤迤光黼座凌亂綴珠翹
百戲魚龍舞中巖席豹調旌旗攢貝顛肩冠劍掠招搖
樂共鑪烟合班隨舞袖招闈風游廣莫玉局道道遙
穆滿曾觴母洪厓及見堯萬年臨紫極一白慶璇霄

朝會儀如此騫騰意頗饒身唯叅寂寞世豈絀紛囁
姑射消痲癘蓬萊倚沈冥多瑤華攬戴勝珠對引迴鑣
有術探鴻寶何人識爨焦竟須窮海岱直擬並松喬
書就神床寫香從別室燒憐君守華省琢句廢春宵

茅山宗師牧齋王君昇仙謠

昔受西城記華陽許徧窺醉持龍節舞寒借鹿裘披
祇憶山中樂寧期世外悲及傳南岳劍難駐赤城師
畢道能無待玄科本有期紫宮新座席金籙古威儀
茵石哀泉咽松華泣露垂他年歸白鵠尚慰種民思
山中老人有徐常隱劉蟾川俱年八十有七

癸酉正月無疾觀化作二詩悼之

徐隱士

屈山多壽考有子獨徐卿自是青門隱賢於白石生
延年非導引虛己不將迎涓子堪儔侶樵青或使令
要之唯寂寞所以極高明竹杖常同卧參湯只細傾
蛻蟬空更潔相鶴變方成何待要人爵良常特奏名

劉法師

養壽知難測同塵要足嘉佯狂端有在觀妙本無涯
台背衣緣蝨饒涎竈產蠹門迎東郭履人識稚川家
請試囊中玉教飡海上霞戲曾分苦李坐得並浮槎

後日脩仙史于今少盜夸祇疑劉跛子走看洛城花

五言聯句

燈花聯句 永嘉李季和自金陵持趙涼公

書來累宿茵閣下十月三日夜天始霜殊

寒兩鐙並作花遂聯句酒間

星閣迎寒闕霜鍾動夜擬孝光酒深燔木火漏下續蘭

缸寸草螢芝小雨丹葩瑞帶雙金枝交婉變孝光銀粟

亂髻鬢長螭暖飛蛾咲雨膏融吐鳳雙汞珠光透鏡孝光

火齊幻垂幢的的輝青瑣雨淫淫颭玉缸燭龍擎紫

蓋孝光翹燕綴紅雙隣眼書窺隙雨仙眉墨暈窓狂吟

心蕊發喜聽足音孝光折聖風吹座鈎簾月動江青

藜如見遇揮手出紛厖

孝光

七言絕句

京師答薛玄卿二首

重重城闕亂烟花，只擬將身乞酒家。
試聽御溝水下，水可憐汨汨度年華。

無塵棊几似江南，更借氍毹暖暮寒。
誤作山中伸脚睡，舉頭見日是長安。

次韻劉師魯吳山清暉亭三首

鳳去簫韶空隱隱，鶴栖臺殿舊層層。
浮屠立盡千秋雪，誰倩風鈴說廢興。

萬瓦連雲人世窄，一鷄啼日海波紅。
欲窺倒影青冥

外故着危亭紫翠中

故山茅屋破仍欹惆悵西風日夜吹今日偶來高處
望巖家亭上獨多時

水仙

環佩無聲倚碧瀾馮夷聊與度春寒木蘭墜露何人
得待和金盤玉屑飡

蠓梅

商略羅浮水月鄉論資也合弟黃香蠓珠誰與僧虔
戲綴作斜枝小鳳凰

湖山暮歸荅吳養浩脩撰

樓外鴉啼暮雨微歸鞭斜趁落花飛若教禿鬢翁能
飲肯羨山人倒載歸

題楊補之墨梅二首

爭笑華光白尚玄吮香指墨汗天然誰知玉匣雙鉤
法解作冰花錢線圈

寒香飛下桐江水草棘荒臺不似春推起筠蓬驚鳥半
面清風堂下斷無人

野桃花

野桃無語最含愁若箇林間得放牛比以落英隨糞
草不如流水出香溝

三衢溪中

大溪中道放船流
船壓山光瀉碧油
三百里灘歌枕
過買魚釀酒下嚴州

東風惡劇雨飛花
蓬底春寒水漲沙
蘭茝溪香小回
首一峰晴雪是金華

界道飛流山翠重
杜鵑無語杜鵑紅
歸人一舸貪新
水渾墮丹青便面中

舟行義興泮練湖訪王子敬

青山一帶玉鈎連
風緊雲輕浪拍船
人在高樓應指
似南陵江上杜樊川

春樹

林木渾將螺黛施朱二白二上花枝三年刻楮知何
用不及春工老畫師

春禽

住處山深禽鳥多閑二好語戲庭柯絕怜子野才情
減偏聽歌聲喚奈何

春耕

黃四娘家水隔陂插秧高下綠淤二壺漿稚子看牛
聞却過田頭午餉時

春燒

日落前山野燒生白茅黃葦地初晴明朝却賦雉帶
箭呼酒岡頭看火城

春衣

已拆天吳歸短褐誰怜草色妬宮袍君看白苧無裁
製羞殺美人金錯刀

春酒

雲度青天落酒杯花枝半拂鹿巾摧陶公醉石蒼苔
蒲不見狺狂李白來

春菜

土甲離_二宿雨痕畦蔬小摘當盤飡紅綾餅餤殘牙

齒合向岩頭嚼菜根

春藥

紫甲紅芽玉滿闌時分花雨潤斑斑
茯苓乍可來歸籠遠志從來不出山

燕口洞

岩肩岫幌杳難期欲寫黃庭寄所思
誰信碧桃花落去丹砂空浸漚麻池

寄馮子振待制附天目僧過廣陵

天目峰頭一鶴回白雲持贈當寒梅
瓊花觀裏開包處寄得玄沙白紙來

三都一序爭傳賦借重西州皇士安慚愧山圖經品藻苦心留得後人看

龍虎山鄭良楚來從劉宗師入京

目送三峯鸞鵠羣更憑谷口喚夫君莫嫌卧病隣東叟留得長鏡管白雲

金鯉魚

丹砂龍子赤如日一斛海水真金芒我欲騎之上天去引得風雲來繞床

李商隱學仙

誰云有分不閑情淪謫千年為底名消得羊權火浣

布詩中唯數玉溪生

惠山前小樓名栖霞

眉間翠氣潑山光
螭口銀餅取水嘗
行盡東坡濯足澗
無人知道北窓涼

吳興道中三絕

暗港陰塍乳犢眠
涼風絲鬢颺縹烟
埋名慚愧蘆中老
坐閱江湖逆順船

風轉灣碕半折蒲
意行弄水不嫌迂
筆床政掠鷺羣過
疑殺山陰染翰圖

眠溪大樹不見日
牧鷺小兒兼賣魚
南風相送玉湖

口舟子飯時吾讀書

冬十一月茵山脩嗣真館成製十絕句

崇元館主在齊梁迺有元之吳郡張相望八百四十
載我歸鶴臺如故鄉

望見飛簷松杪花下盤陰洞石聳牙老樵迷路驚相
問若个仙人道士家

風水所言惟理氣眼明此術未全踈景純解道游仙
句信是青囊有異書

縹緲洞庭連白雲綠苔黃柑能見分昨日扁舟尋好
事明年處士比封君

擬借山中步幃錦與作天下庇寒裘三尺窓櫺萬株
木不怕霜寒到上頭

谷中董一庵住壇上纍二數石陳杖隨流水過隣
舍席與長松分主賓

但倚茅君為座主從稱外史作官街道家六經發願
寫深向石頭藏一函

屋壁置書碑板多虹雄光恠鳳凰阿看到深山十日
雪竈突無烟奈尔何

祇有天公終可倚我作巢居名倚天未必高虛無事

業負日讀書兼打眠

龍虎山中薛玄子瓊林築臺詩亦工應接箇山聊尔
耳非関千里事同風

李遵道馬蟠松

樹木何知曲全意世人莫恠支離形中茅嶺上蒼髯
叟卧護東南半壁青

小景幘

茅屋蒼苔向渺泚羸牛點點隔荒陂平生慷慨歸田
賦未必蘭苕翡翠知

勾曲外史貞居先生詩集卷之五

吳郡海昌張雨伯雨撰

吳郡徐達立良夫校

題范德機編脩東坊藁後

一編上有東坊字慚愧詩中見大巫直想瘦生如飯
顆竟從痒處得麻姑咸池水淺孤黃鵠空谷天寒病
白駒擬共風流接尊酒祗愁塵土沒雙鳥凡

次韻孫大方真人仙興三首

麻姑海上信全踈官府神仙得自如飛鼠潛窺食玉
法蝨魚私泣殺青書晚尋五老神猶王夜守三彭病

頻除傳語內芝煩見待幾時揮手約凌虛

仙仗來時瑞氣屯真人玉女侍靈軒亭二珠穗香烟

直爛二搏桑玉色溫華雨掃塵鸞鳥帶濕鴨雲承鞞

蜃樓昏至今星斗天壇夜望拜清都紫府門

風語琅璫曉漏沉露簷時下九臯禽早知鴻寶遺丹

訣獨許青藜識苦心玉局狡狴華蓋小金波鵲鵲燕

珠深無因得禮朝元閣圓象中間雪一簪

寄浚儀公

亭下鷗波好放船蒼葭蒹葭水如天投綸漁火小垂
手化蝶秋蟲大學仙麻紙丹書應滿笈鱖魚紫蟹

不論錢清真逸少誰同傳獨許華陽許叔玄

桐栢觀

百折丹梯杪萬松鳳笙臺殿赤城鍾親從海上求司
馬寧復山中起卧龍璫闕排雲窺坐席銀橋乘月記
仙蹤真人及此東行日咲說盧敖向九峰

和馬伯庸御史春游依次用韻

山中墊角雨仍斜歲_二春風換鬢華湖口水香魚在
藻江南食冷客思家鷺峰掃石繡經葉龍洞分符調
井花游騎却歸城郭暮醉紅猶帶臉文霞

留題西湖何氏隱真館

鷄犬雲中豹一班路隣仙冢昔躋攀說經僧去黃龍
卧負藥僮歸白鹿閑酒仰秫田陶令宅井分丹水葛
洪山不日早約昭臺侶此地從知數往還

魏國趙夫人管君挽詩

曾謁西池閼殿春賜封大國寵疏頻擇婿當年郗太
傅能書今日衛夫人玉鏡離臺空掩月寶衣堆桁暗
凝塵千秋鄉中名不沒墓有通兒書老銀

秦定丁卯歲沙溪元日

山世行藏本不羈江東節序片帆隨三朝猶是嘉平
膺七字又題丁卯詩赤石青林含古色白沙翠竹照

清漪春風浩蕩鷗波興終要南山霧豹姿

次韻鄧善之學士贈無極元講主

林下幽人宿昔期相看濁水照摩尼自緣結社從陶
令不為聽琴識穎師梵放鬆風將數里定迴蓮漏下
多時紫芝采二堪持贈忽憶荆門已有詩

舟次吳江寄李漑之學士

垂虹散髮思飄然悔不金陵捉酒仙詩有羊何方得
和世無李郭更同舡金人掌上三危露玉女窓中五
色煙莫待遂良鬚盡白共尋瑤草看明年

贈華蓋山人

聞道江南第一峰，浮丘仙伯此遺踪。諸天倒影陰時見，萬壑層冰赫日封。雷火浣壇龍抱柱，羽衣垂蓋鶴巢松。高居絕頂三千日，乞我平生玉鍊容。

碧筒酒

采綠誰持作羽觴，使君林下晚尊涼。玉醪沁露心微苦，翠管承雲手亦香。飲海龜藏蓮葉卷，吸川鯨恨藕絲長。傾杯悞展淋漓袂，咲絕耶溪窈窕娘。

句容趙漢章松澗堂

誰展虛堂望翠寒，從橫圖史有餘寬。對枝曾閱嘉平臘，石甃猶涵抱朴丹。靜士心源如白水，老人年髮比

蒼官清流蔭映芝蘭秀我欲相從賦考槃

懷薛玄卿外史

丹樓百尺倚雲霄有客懷仙興獨高腰下蒼精纏寶
氣眉間脉望卷金毛擬招薛子青田鶴與釣任公碧
海鰲幸自蒼頑同木石思君一息夢勞

用韻寄荅李黃巖同年

十年契闊貯離愁憶共乘風御水舟避地烟霞知更
暖問年蒲柳惜先秋對猶如此桓司馬畫亦通靈頤
虎頭未領浙東山水郡幾時騶從枉林丘

雲林清遠

華陽范監居幽眇不到玄窓未易逢山氣半為湖外
雨松聲遙蒼嶺頭鍾常聞神女騎龍過亦有仙人控
鶴從安用乘流三萬里小天元在積金峰

寄中竺寺咲隱師

繡經臺畔惜分携華蓋峰前幾夢思半席地分眠鹿
草四更月在掛猿枝我書安能半袁豹君才端倍十
曹丕上番相逢虞秘監不嫌頻窺仰山碑

書盧疎齋宣城集後

人物西清第一流曾看繡斧下瀛州難求冀北千金
骨空載江南數斛愁小謝夢無春草句大蘇詩有景

踈樓敬亭依舊峨眉月付與盧敖汗漫游

初寒

新晴獲稻空隣曲獨畏初寒體不勤衲被敷晨粥
擁糟床瀏夜燈聞折鐺尚帶龍頭菌破几亦生蛇
蚶文山鬼情知莫相惱石頭鷄犬白於雲

金陵僧來聞咲隱住持事繁風雨有懷

憶曾共坐繡經石語我松華壓酒方一自宜城居輔
國幾時天竺話連床栖春草亢桑楚歷風鈴替
戾岡乞得江東今夕雨與君聊洗夢中忙

自咲

自咲摧頽如病鶴羽衣仍復會婆娑已栽班竹將扶
老更翦蟠枝作養和驟雨欲來移蟻穴落華都罷分
蜂窠裏頭多上春官者不道丘園自一科

劉宗師還山得詩後奉一首

丹鳳門前送羽車清詩滿袖出京華雕蟲徒刻三年
楮補衮應飡五色霞太白晚傳青綺帔元君早授玉
門砂要知不隔金闈步常是相從太極家

蘆花褥

自愛柔茵一榻平岸霜都著楮囊盛夢同宿鴈經寒
暖身與浮雲較重輕待我鷄鳴分豆粥咲誰鯨卷對

藜羹卧游江海平生意布被公孫尚為名

墨妙

房櫳新柳待陰遮澗道流泉走脉斜
蟪蛄履雨磨苔齒折杯尊水湊石唇窪
金頭玉躡脩仙史縹帶細枝折瑞花愛
玩奎章新墨妙坐拈如意帖龍蛇

春日題蘇仲簡曲林梅石卷

不到幽人曲水巖春風一昔徧江南
白雲根暖花如霰紫翠落深玉作龕
石髓何曾遇王烈鶴情應祇戀蘇耽
鉄心自咲蒼頑甚呵凍題詩雪滿簪

閏三月三日北山看花不與盟

應咲黃楊厄閏時後三仍復負芳期老無劉几簪花
分間有陶潛止酒詩穀雨林中先紫筍鬱岡山口足
黃鸝韓湘自倩奴星去袖得瑤臺第一枝

廣陵有寄瓊花詩丐余次韻

未信人間日易斜携春來問列仙家情知后土無雙
對迷殺江都是此花芍藥謾吟紅繭栗璫兒從盼玉
蘭芽一壺能共樊川老醉寫烏絲側帽紗

適京口目訪鶴林即休長老

重過研山餘一載倦投禪榻似還家彌天舊有三三
語掃地春無七七花古竹能脩櫻筍供病夫與試石

霜茶松風元在袈裟角一宿何煩更永嘉

開玄館田舍之環綠軒留書楣間

高懷的的遠人羣更占寬閒養白雲豈直山林為避
世由來畎畝不忘君鶴天隊仗青排闥花雨周遭碧
染帟昔日庚桑今向老帶經亦欲事耕耘

題松雪翁着色便面為倪元鎮作

誰寫面屏松石岡斷烟平楚間微茫障塵不借蒲葵
影弄翰同歸粉墨囊驢背書生猶洛下鷗波亭子只
山陽憑君更倩盧鳴一滿把清風畫草堂

次韻倪元鎮贈小山張掾史

為愛髯張亦癡絕簿領塵埃多強顏何如膝上王文
度轉憶江南庾子山綠對四隣懸榻在青山千仞荷
鉏還風流詞客凋零盡莫恠參軍語帶蠻

形影

形影胡為樂此留山川暎發思綢繆歌長杯酒毋多
酌世短何人第一流弟子受經猶北面樵青分屋自
西頭下方悞識金銀氣直倚空同一劍秋

寄薛玄卿時張仲舉有作同附

百壺美酒卮銷憂數卷道書天與游
既雨秋城苦泥淖未寒病骨思衣裘
看我目光牛背上憶君珮響鳳池頭
情知契濶寧復語白鵠斯舉不可留

龍虎山上元夜

琵琶峯青溪水光通明之宮何煌煌
蒼精龍文天上下朱衣魚鬣殿中央
烟華夜遺玉條脫幢珮風雜金琅璫
燈前老對支離子閱世無言意最長

懷茅山

我有草堂南洞門常時來往虎同羣
丹光出林掩明

月玉氣上天為白雲間憶田泉洗蒼木更思陶澗采
香芹歸來閉戶償高卧莫遣人書白練帟

青春

青春到手難把玩華髮侵尋非故吾遮莫虎頭能食
肉何如犢鼻分當壚鬱金交綴松華粉赤玉瑩磨崖
蜜珠安得情人來石上長拈酒杓共歌呼

崇壽觀太元殿前栢是咸陽說經臺本所謂
衢枝栢者賦詩以告山中人

洞門仙栢鬱森森氣接金天太華岑翠滴空青嵐霧
重影團水碧殿堦陰甚齊香葉毋煩翦不朽靈根未
用鍼誰與安排玉如意歲寒唯尔可論心

寄季和

孰與言詩李髯叟一日不見已為踈因觀故京來白
下載聞新作過黃初小峯待月許携杖中林放鶴要
回車杜陵醉歌不易得豈惜華陽真逸書

二月一日快雪時晴

雨水寒來雪復作春風相欺何太顛來依井窻皆獸
迹坐攤書冊猶鳶肩枸杞埋根乍難斲櫻桃始華殊
可憐賀監宅前舊湖水快放柳條維酒船

題趙榮祿書貞素鍊師碣銘後

玉冠青帔髮如蓬此是夫人林下風移家未隱鹿門
裏尋師當往赤城中琴床夜聞別鶴語韻軒日點飛
鸞紅半生寫盡洛神賦得似九華書一通

題四皓圖

辟穀晚從赤松子授書蚤師黃石公羽翼已成俱引
去四老相為之始終用人家國有師法後來路絕商

嶺中駟馬高蓋兒戲耳為君留眼送飛鴻

徐元度清容齋分韻得深字

誰門無事有山林長日置酒梁溪陰可能暫足解高士
榻莫恠不鼓昭文琴紅榴著雨綴多子蒼栢過墻踰
一尋清詩妙舞子所樂避世堂成何用深

汪道人野逸軒

黃鶴之山多隱淪野逸軒中誰主賓落花流水自成
歲閉戶踰垣俱絕塵山川會有淳朴處埃壘難求澹
蕩人酷無文采如我輩牛矢鷄栖當結隣

次韻倪元鎮見寄

衣桁常容蛛網懸石床渾讓女蘿牽道術何煩孔郎
廟屋廬政用却超錢泉崩礮底歸樵路雨壓厨頭蒸
木烟誰見西林拆書夜一枝風竹鵲鳩眠

